

MESYUARAT KEDUA, PENGGAL PERTAMA
PARLIMEN KEEMPAT BELAS
2018

HARI KHAMIS : 22 NOVEMBER 2018

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN CHAN FOONG HIN
[KOTA KINABALU]**

TARIKH : 22 NOVEMBER 2018 (KHAMIS)

SOALAN NO. 1

Minta **MENTERI PERUMAHAN DAN KERAJAAN TEMPATAN** menyatakan perancangan Kementerian pengurusan sisa pepejal dengan konsep “satu negeri satu insinerator”.

JAWAPAN

Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) merancang untuk membina sekurang-kurangnya satu loji *waste to energy* (WtE) di setiap negeri memandangkan pembinaan tapak pelupusan memerlukan penggunaan tanah yang luas. Pembinaan loji WtE ini dapat mengurangkan impak negatif terhadap alam sekitar seperti kebakaran, bau, limpahan *leachate* dan sebagainya. Perancangan pembinaan loji WtE ini perlu mengambil kira kapasiti dan ciri-ciri sisa pepejal (*waste characteristic*) di sesuatu kawasan serta jarak kawasan kutipan sisa pepejal ke loji supaya pengurusan sisa pepejal di setiap kawasan dapat dilaksanakan secara efisien dan berkesan.
2. Selain daripada merawat sisa pepejal, loji WtE ini dapat menghasilkan tenaga elektrik dan gas yang mana penjualan semula tenaga tersebut dapat membantu dalam mengurangkan kos pengoperasian dan penyelenggaraan loji tersebut. Pada masa ini, pembinaan loji WtE di Ladang Tanah Merah, Negeri Sembilan sedang dilaksanakan dan dijangka akan beroperasi pada Jun 2019.
3. Walaupun loji WtE dibina, tapak pelupusan masih diperlukan bagi menampung sisa baki hasil daripada proses rawatan tersebut serta menampung sisa pepejal yang tidak dapat dirawat dalam tempoh penyelenggaraan loji WtE. Namun, tapak pelupusan tersebut tidak memerlukan kawasan yang luas memandangkan kuantiti sisa yang akan dilupuskan dijangkakan akan berkurangan dengan pelaksanaan program *reduce, reuse* dan *recycle* (3R).

Sekian, terima kasih.

SOALAN NO. : 2

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI DR. HAJI WAN JUNAIDI BIN TUANKU
JAAFAR [SANTUBONG]**

TARIKH : 22 NOVEMBER 2018 (KHAMIS)

SOALAN NO.2

Dato' Sri Dr. Haji Wan Junaidi bin Tuanku Jaafar [Santubong] minta **MENTERI AIR, TANAH DAN SUMBER ASLI** menyatakan adakah kajian semula dibuat berhubung dengan kesan banjir, kenaikan paras air laut dan hakisan pantai akibat “perubahan iklim” dunia, dan berapa projek seluruh negara dikenal pasti untuk di laksanakan untuk *mitigate* kesan fenomena ini, kalau tidak berapa projek-projek di cadang selepas 2015 akan di laksanakan, kalau tidak kenapa tidak.

SOALAN NO.2

JAWAPAN:

Tuan Yang di-Pertua,

Kementerian Air, Tanah dan Sumber Asli (KATS) melalui Jabatan Pengairan dan Saliran (JPS) sedang dan akan melaksanakan Kajian-kajian berhubung dengan kesan banjir dan hakisan pantai sama ada ianya disebabkan oleh perubahan iklim dunia atau punca-punca yang lain. Sehingga kini, sebanyak 78 projek tebatan banjir/ saliran mesra alam dan 14 projek hakisan pantai telah diluluskan di dalam RMKe-11 di bawah Kementerian Air, Tanah dan Sumber Asli bagi mengurangkan (*mitigate*) kesan fenomena banjir dan hakisan pantai.

Kementerian akan terus membuat permohonan program/ projek dalam *Rolling Plan* (RP) dan Rancangan Malaysia bagi mengurangkan (*mitigate*) kesan fenomena banjir dan hakisan pantai di seluruh negara dan ianya bergantung kepada keadaan kewangan Kerajaan.

KATS melalui Institut Penyelidikan Hidraulik Kebangsaan Malaysia (NAHRIM) juga sedang/telah melaksanakan penyelidikan berkaitan kesan-kesan banjir, kenaikan paras air laut, hakisan pantai akibat kesan perubahan iklim dunia dan usaha-usaha yang telah dijalankan adalah seperti berikut:

- a) Kajian Kesan Perubahan Iklim ke atas Regim Hidrologi dan Sumber Air di Sabah dan Sarawak (2010)

- b) Kajian Lanjutan Impak Perubahan Iklim ke atas Regim Hidrologi dan Sumber Air di Semenanjung Malaysia (2014).
- c) kajian lanjutan kesan perubahan iklim ke atas sumber air Malaysia termasuk Sabah dan Sarawak berdasarkan senario pemanasan global terkini.
- d) Kajian semula unjuran kenaikan aras laut di sepanjang pantai Malaysia.
- e) Kajian Kesan Ban Pantai Terlumpah Terhadap Pertanian di kawasan pantai.
- f) Kajian Coastal Vulnerability Index di Kelantan, Negeri Sembilan dan Johor.
- g) Kajian Fizikal Inovasi Adaptasi Peningkatan aras laut.
- h) Kajian Kesan Penorobosan Air Masin di Muar & Sibu.
- i) Projek Penyelidikan Lanjutan dan Pembangunan Prototaip Produk Inovasi Sistem Perlindungan Hakisan dan Perluasan Pantai NEXCOM NAHRIM (untuk pantai lumpur).

Sekian, terima kasih.

PEMBERITAHUAN PERTANYAAN BAGI JAWAPAN LISAN
MESYUARAT KEDUA PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

DARIPADA : YB TUAN NIK NAZMI BIN NIK AHMAD

TARIKH : 22 NOVEMBER 2018

SOALAN :

Tuan Nik Nazmi bin Nik Ahmad [Setiawangsa] minta **MENTERI SUMBER MANUSIA** menyatakan apakah langkah segera yang diambil untuk menangani pengangguran belia terutamanya graduan yang serius. Menurut MIDF Research, pengangguran belia pada 2017 mencecah 10.8% sementara graduan sahaja mencatat 204,000 orang atau 40.5% dari jumlah pengangguran belia.

PR-1412-L01488

JAWAPAN

Tuan Yang Di Pertua,

1. Jumlah pengangguran belia adalah 516,400 orang, peratus pengangguran belia pula 27.3%. (Definisi belia adalah dari umur 15 tahun sehingga 24 tahun.) Graduan yang menganggur pada tahun 2018 ialah seramai 140,977 orang.

2. Berdasarkan Laporan Pertubuhan Buruh Antarabangsa (ILO) menunjukkan iaitu kira-kira 45 peratus kadar pengangguran di Asia Pasifik adalah di kalangan belia. Bilangan pengangguran yang tinggi adalah dalam lingkungan yang berumur 15 hingga 24 tahun, situasi ini menunjukkan pengangguran belia bukan eksklusif kepada Malaysia sahaja tetapi dihadapi oleh setiap negara membangun dan maju.

Tuan Yang Di Pertua,

3. Sebagai perbandingan, Pertubuhan Buruh Antarabangsa (ILO) menerusi penerbitan *Global Employment Trends for Youth 2017* menganggarkan kadar pengangguran belia di peringkat global berada pada paras 13.1% pada tahun 2017 dan 2018, meningkat berbanding 13.0% pada tahun 2016. Jumlah ini mewakili seramai 71

juta belia menganggur di seluruh dunia. Kadar pengangguran belia di negara membangun dan maju, antaranya, adalah seperti berikut:

Negara	Kadar Pengangguran Belia
China	12.4%
India	9.7%
New Zealand	14.4%
Norway	10.1%
Australia	13.5%

Kadar pengangguran di atas menunjukkan keadaan yang lebih tinggi atau setara dengan kadar pengangguran belia di Malaysia.

Tuan Yang Di Pertua,

4. Bagi mengurangkan kadar pengangguran belia, Kerajaan telah mengambil langkah-langkah berikut:-

- (i) Menyediakan portal perkhidmatan pekerjaan *JobsMalaysia* yang memberi kemudahan kepada pencari kerja termasuk belia untuk mendapatkan kerja yang bersesuaian melalui pendekatan pepadanan kerja;
- (ii) Menganjurkan program penempatan pekerjaan yang merangkumi Karnival Kerjaya dan temuduga terbuka telah diadakan dari semasa ke semasa bagi menemukan pencari kerja dengan majikan yang sepadan. Bagi tempoh

Januari – Jun 2018, Program Penempatan Pekerjaan telah berjaya menempatkan seramai 95,387 orang pencari kerja melibatkan golongan siswazah dan bukan siswazah;

- (iii) Mewujudkan pusat sehenti menggabungkan agensi seperti *JobsMalaysia*, Pertubuhan Keselamatan Sosial (PERKESO), Pembangunan Sumber Manusia Berhad (PSMB) dan Unit Peneraju Agenda Bumiputera (TERAJU) di UTC bagi menyediakan khidmat nasihat profesional untuk mendapatkan pekerjaan dan latihan; dan
- (iv) Memperkemaskan dan memperluaskan program perantisan dan latihan industri yang bertujuan meningkatkan tahap kebolehpasaran belia khususnya graduan melalui latihan *soft-skills* dan *on-the-job training*. Program-program seperti ini telah menunjukkan kejayaan di mana lebih 90 peratus belia yang mengikuti program tersebut mendapat pekerjaan.

5. Kesimpulannya, Kerajaan yakin semua langkah-langkah yang telah dilaksanakan dijangka dapat membantu belia mendapatkan pekerjaan dan mengurangkan lagi kadar pengangguran belia negara.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

**DARIPADA : TUAN AHMAD TARMIZI BIN SULAIMAN
[SIK]**

TARIKH : 22 NOVEMBER 2018

SOALAN : Tuan Syed Ibrahim bin Syed Noh [Sik]
minta **MENTERI LUAR NEGERI** menyatakan langkah serantau khusus melalui ASEAN untuk membawa pihak yang bertanggungjawab di Myanmar ke muka pengadilan antarabangsa akibat pembunuhan dan pelanggaran hak asasi manusia ke atas etnik Rohingya di wilayah Rakhine, Myanmar.

JAWAPAN

Tuan Yang di-Pertua,

Terima kasih saya ucapkan kepada YB Sik atas pertanyaan yang dikemukakan.

Tuan Yang di-Pertua,

2. Malaysia mengambil pendirian berprinsip yang jelas dan konsisten mengenai isu penindasan etnik Rohingya. Malaysia bukan sahaja aktif membangkitkan isu ini di peringkat ASEAN, malah juga di peringkat OIC dan di Pertubuhan Bangsa-Bangsa Bersatu (PBB). Sejak berlakunya krisis kemanusiaan melibatkan etnik Rohingya, Malaysia terus menggesa Kerajaan Myanmar menghentikan penindasan dan kekejaman yang dilaporkan berlaku ke atas etnik Rohingya.

3. Menerusi satu kenyataan Menteri Luar Negeri bertarikh 29 Ogos 2018, Malaysia telah menuntut agar mereka yang bertanggungjawab ke atas pelanggaran hak asasi manusia etnik Rohingya di bawa ke muka

pengadilan, termasuk melalui mekanisme kehakiman antarabangsa. Malaysia juga mengemukakan kebimbangannya ke atas hasil laporan yang dikemukakan oleh *United Nations Independent International Fact-Finding Mission* (FFM) berkenaan Myanmar, yang meneliti pelbagai bentuk kekejaman, penindasan dan diskriminasi yang dilakukan ke atas etnik Rohingya. Malaysia berpandangan bahawa ianya mempunyai persamaan dengan kes-kes genosid yang pernah berlaku sebelum ini. Dalam masa yang sama, Malaysia juga telah menzahirkan kekecewaannya kepada Kaunselor Negara Myanmar, Aung San Suu Kyi, melalui Utusan Khas beliau yang membuat lawatan ke Malaysia pada 5 September 2018. YAB Perdana Menteri juga telah membangkitkan isu penindasan etnik minoriti Muslim di Myanmar dan mempersoalkan sikap tidak endah masyarakat antarabangsa dalam ucapan beliau di Perhimpunan Agong PBB ke -73 baru baru ini.

Tuan Yang di-Pertua,

4. Di peringkat PBB, Malaysia tidak teragak-agak untuk membangkitkan isu Rohingya. Contohnya di bawah kerangka Majlis Hak Asasi Manusia (HRC), PBB, Malaysia terlibat aktif dalam perbincangan berhubung isu Rohingya. Malaysia juga menyokong penuh (*co-sponsor*) resolusi PBB yang memberikan mandat kepada (dengan izin) *Independent, International Fact-Finding Mission (FFM) on Myanmar* untuk membuat penyiasatan ke atas kes ini. Proses ini telah menghasilkan satu laporan komprehensif berkenaan pelanggaran hak asasi manusia melibatkan etnik Rohingya.

5. Pada Sesi HRC ke-39 yang diadakan di Geneva, Switzerland pada bulan September 2018, Malaysia telah berjaya, bersama-sama dengan negara-negara OIC dan Kesatuan Eropah, membawa satu resolusi berkenaan situasi hak asasi manusia etnik Rohingya dan lain-lain minoriti di Myanmar. Hasilnya, satu mekanisme baru ditubuhkan di bawah HRC untuk mengumpul dan menganalisa bukti-bukti pelanggaran hak asasi manusia yang berlaku ke atas kumpulan minoriti termasuk etnik Rohingya di Myanmar. Tujuannya adalah untuk membantu proses pengadilan antarabangsa di masa akan datang.

Tuan Yang di-Pertua,

6. Kerajaan terus meneliti langkah-langkah yang dikatakan diambil oleh Kerajaan Myanmar untuk menyiasat kes-kes pelanggaran hak asasi manusia yang dilaporkan. Walau bagaimanapun, sehingga kini, proses dalaman Myanmar untuk menegakkan kedaulatan undang-undangnya sendiri dilihat tidak berjaya mendapatkan keadilan yang sewajarnya.

7. Justeru, Malaysia telah pun mencadangkan agar isu penindasan etnik Rohingya ini dikemukakan kepada mana-mana mahkamah antarabangsa. Pada masa ini, satu proses penyiasatan telah pun bermula di Mahkamah Jenayah Antarabangsa (*International Criminal Court - ICC*).

8. Dalam hal ini, Malaysia berpandangan bahawa Majlis Keselamatan PBB (*United Nations Security Council - UNSC*) juga berperanan untuk merujuk isu Rohingya ini kepada proses kehakiman antarabangsa, termasuk dalam menubuhkan tribunal antarabangsa dengan mandat khas. Namun, kuasa-kuasa P5 Majlis Keselamatan PBB dijangka tidak akan bersepakat berhubung perkara ini. Walaupun begitu, Malaysia akan terus menggembelng tenaga dengan negara-negara yang sependirian (*like-minded countries*) untuk memastikan agar keadilan dapat dilunaskan kepada etnik Rohingya.

Sekian, terima kasih.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATUK ALEXANDER NANTA LINGGI
[KAPIT]**

TARIKH : 22 NOVEMBER 2018 (KHAMIS)

SOALAN : 6

minta **MENTERI PEMBANGUNAN LUAR BANDAR** menyatakan status terkini cadangan projek MARA Edu-Biz Park dilaksanakan di Daerah Kapit, untuk Negeri Sarawak. Sehubungan itu, bilakah bermulanya program Kolej Professional MARA Daerah Kapit akan dibuat.

JAWAPAN:

Tuan Yang Di-Pertua,

Untuk makluman Yang Berhormat, pada masa sekarang, MARA tidak berhasrat untuk meneruskan projek Edubiz Park memandangkan kedudukan kewangan semasa kerajaan.

Walau bagaimanapun, MARA akan meneruskan projek pembinaan Kolej Professional MARA (KPM) Kapit yang telah diluluskan kos pembinaan sebanyak RM97 juta dalam Rolling Plan 4 tahun 2019, RMKe-11. Pembinaan Kolej Professional MARA Kapit ini akan bermula dengan proses perolehan tanah yang akan dilaksanakan bermula Januari 2019 dan seterusnya proses pembinaan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KE-EMPAT BELAS**

PERTANYAAN : LISAN

**DARIPADA : DATUK ROZMAN BIN ISLI
[LABUAN]**

TARIKH : 22 NOVEMBER 2018 (KHAMIS)

SOALAN NO. 7

Minta **MENTERI PENGANGKUTAN** menyatakan apakah perancangan Kementerian untuk menaik taraf pelabuhan Labuan yang sebenarnya berpotensi untuk menjadi regional entrepot. Pada masa ini, Pelabuhan Merdeka Labuan yang sudah tua dan sesak itu sudah tidak sesuai untuk terus berada di kawasan bandar.

JAWAPAN

Tuan Yang di-Pertua,

1. Isu kesesakan di Pelabuhan Labuan sering kali berlaku sejak beberapa tahun kebelakangan ini dan yang terkini adalah pada 24 September 2018. Susulan daripada kejadian tersebut, pihak Lembaga Pelabuhan Labuan (LPL) telah meneliti langkah-langkah penambahbaikan yang perlu diambil serta perancangan masa hadapan bagi menyelesaikan isu kesesakan di Pelabuhan Dermaga Merdeka.
2. Kementerian Pengangkutan juga mengakui bahawa ketika ini situasi Pelabuhan Dermaga Merdeka di Labuan agak sesak dan perlu dilihat dari aspek kesesuaian untuk terus beroperasi di kawasan bandar. Oleh yang demikian, bagi mengatasi masalah tersebut LPL sedang merencana pelan bersifat jangka pendek, sederhana dan panjang seperti berikut:

(a) Jangka Pendek

LPL sedang memperkukuhkan aspek kawal selia dan pentadbiran di Dermaga Merdeka dari semasa ke semasa bagi memastikan isu kesesakan di pelabuhan tidak berulang melalui pendekatan menambah baik mutu perkhidmatan dan kemudahan di pelabuhan seperti berikut:

- (i) LPL akan memastikan kontena yang ditempatkan di Dermaga Merdeka berada pada had kapasiti 800 TEUs sahaja dalam satu masa;
- (ii) jeti kepunyaan Jabatan Laut Malaysia (JLM) di kawasan perindustrian Rantau-Rantau dijadikan kawasan operasi kumpul bagi membolehkan kerja-kerja memuat kargo (beras/gula) dijalankan; dan

- (iii) operasi pengendalian kontena di Dermaga Merdeka akan dipantau rapi dan penggunaan kren atau jentera tertentu akan digunakan sekiranya terdapat keperluan bagi melicinkan operasi.

(b) Jangka Sederhana

LPL sedang dalam proses menguatkuasakan undang-undang sedia ada melalui pendekatan penggubalan undang-undang kecil pelabuhan bagi membolehkan LPL mula mengutip hasil pelabuhan yang akan digunakan semula untuk tujuan penambahbaikan perkhidmatan dan pembangunan masa hadapan.

(c) Jangka Panjang

- (i) LPL sedang mengenal pasti lokasi yang bersesuaian di Labuan untuk memindahkan aktiviti dan operasi pelabuhan pada masa hadapan bagi mengurangkan masalah kesesakan di Pelabuhan Dermaga Merdeka; dan
- (ii) LPL sedang meneliti dan memperhalusi cadangan dan pendekatan untuk menswastakan Pelabuhan Labuan menerusi Akta Pelabuhan-Pelabuhan (Penswastaan) 1990 dengan melantik mana-mana syarikat yang berwibawa sebagai operator pelabuhan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH
BIN HAJI MOHD FAKEH [SABAK BERNAM]**

TARIKH : 22 NOVEMBER 2018 (KHAMIS)

SOALAN NO. 8

Minta **MENTERI PENDIDIKAN** menyatakan jumlah pelajar yang menerima kemudahan Rancangan Makanan Tambahan (RMT) dan nyatakan langkah Kementerian bagi memastikan dana RMT tidak diseleweng oleh guru besar.

JAWAPAN

Yang di-Pertua,

Untuk makluman Ahli Yang Berhormat, jumlah murid yang menerima bantuan Rancangan Makanan Tambahan (RMT) bagi tahun 2018 adalah seramai 489,117 orang iaitu hampir setengah juta. KPM sentiasa berusaha untuk memastikan supaya semua bantuan pendidikan yang disalurkan kepada murid-murid tidak diselewengkan dan diurus serta dilaksanakan dengan baik. Sehubungan dengan itu, bagi memastikan peruntukan RMT yang diturunkan ke sekolah diurus dengan kaedah urus tadbir kewangan yang baik, KPM telah mengambil langkah-langkah seperti berikut:

1. Memastikan Guru Besar yang dipilih adalah dalam kalangan mereka yang berintegriti dan amanah untuk menduduki jawatan tersebut.

SOALAN NO:8

2. Menambahbaik Surat Pekeliling Kewangan dari semasa ke semasa berdasarkan input daripada maklum balas audit dan maklum balas pemantauan.
3. Membekalkan sekolah dengan Buku Panduan Pengurusan Program RMT yang mengandungi panduan komprehensif dalam menguruskan program bermula daripada pemilihan pelajar, pengurusan kontrak, proses pembayaran dan penilaian perkembangan fizikal murid. Ini dilakukan secara teratur dan tersusun dengan rekod yang sentiasa kemas kini.
4. Proses pemantauan diwujudkan untuk dilaksanakan oleh pihak Pejabat Pendidikan Daerah (PPD) dan Jabatan Pendidikan Negeri (JPN) dengan objektif memastikan sekolah patuh kepada Surat Pekeliling Kewangan dan Buku Panduan Pengurusan RMT yang disediakan oleh pihak KPM.
5. Pelaksanaan Audit Dalam MS ISO 9001:2015 di semua PPD dan JPN bagi memastikan program diuruskan dengan baik oleh pegawai di PPD dan JPN.
6. Pendedahan awal oleh Institut Aminudin Baki (IAB) kepada bakal-bakal pentadbir (guru besar dan pengetua) dalam kursus NPQEL berkaitan pengurusan program RMT. Ini adalah bagi memastikan latihan yang cukup dan terlatih untuk menguruskan RMT.

KPM menggalakkan semua pihak terutamanya PIBG untuk melaporkan jika ada apa-apa salah laku oleh mana-mana pihak termasuk Guru Besar dalam pengurusan RMT jika mereka mempunyai bukti. Ini akan banyak membantu untuk KPM memantau dan memastikan supaya bantuan yang diberikan sampai kepada golongan sasaran.

Sekian, terima kasih

RJM114

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB. TUAN ALI ANAK BIJU
[SARATOK]**

TARIKH : 22 NOVEMBER 2018 (KHAMIS)

SOALAN NO.9

Minta **MENTERI PEMBANGUNAN USAHAWAN** menyatakan apakah langkah-langkah yang akan diambil oleh pihak Kementerian bagi menjayakan program keusahawanan di kalangan belia di Sarawak. Berapakah peruntukan yang telah dirancang serta apakah agensi-agensi yang akan melaksanakan program keusahawanan tersebut.

JAWAPAN:

Tuan Yang di-Pertua,

Program Keusahawanan yang disediakan oleh Kerajaan melalui Kementerian Pembangunan Usahawan mensasarkan semua peringkat golongan belia sama ada di bandar mahupun di kawasan luar bandar. Sebagai langkah awal, Kementerian telah mengadakan Konvensyen Memperkasakan Usahawan Bumiputera di Kuching Sarawak pada 6 September 2018 untuk mendapatkan maklum balas dan pandangan usahawan dan PKS termasuk golongan belia di Sarawak.

Seterusnya, selaras dengan aspirasi Manifesto Kerajaan, Program Sesi Dialog dan Bengkel *Technical Working Group* (TWG) dengan tema "Pembudayaan dan Pemerkasaan Keusahawanan Anak Muda" telah diadakan melalui kolaboratif strategik oleh Kementerian Pembangunan Usahawan dan Kementerian Belia dan Sukan (KBS). Program ini telah diadakan di *Malaysian Global Innovation & Creativity Centre* (MaGIC), Cyberjaya pada 25 September 2018 dan dihadiri oleh lebih 600 usahawan anak muda dari pelbagai segmen dan kelompok di akar umbi.

Tuan Yang di-Pertua,

Program ini merupakan komitmen dan inisiatif penting kedua-dua Kementerian dalam menyediakan platform kepada kumpulan usahawan muda untuk bertukar, berkongsi pandangan serta idea baharu dalam usaha Kerajaan memperkasakan pembangunan serta kesejahteraan usahawan muda supaya lebih terancang, inklusif dan berimpak tinggi. Melalui Sesi Dialog dan Bengkel TWG, beberapa input turut dijadikan asas penting dalam merangka hala tuju program keusahawanan di bawah Dana Pemerkasaan Keusahawanan Anak Muda termasuk bagi negeri Sarawak.

Untuk makluman Ahli Yang Berhormat, antara program-program yang dirancang di bawah Dana bagi tahun 2019 bagi membangunkan keusahawanan dalam kalangan belia adalah seperti berikut:

- i. **Skim Pembangunan Usahawan Profesional Muda Bumiputera oleh TEKUN Nasional** yang menawarkan pembiayaan antara RM1,000 sehingga RM100,000 dalam semua bidang perniagaan terutama bidang-bidang profesional seperti doktor, firma guaman, farmasi, optometri dan sebagainya. Skim ini yang melibatkan belia yang berumur di antara 18 tahun sehingga 40 tahun;
- ii. **Program Tunas Usahawan Bumiputera (TUBE) oleh SME Corp.** yang telah berjaya melatih 245 orang belia Bumiputera dari Sarawak dan berjaya mewujudkan 428 peluang pekerjaan sejak tahun 2014. Program ini dilaksanakan bertujuan untuk mempersiapkan belia dengan ketahanan mental, fizikal, pengetahuan asas perniagaan dan cabaran dalam menjalankan perniagaan;
- iii. **Program *Speed Me Up* oleh SME Corp.** untuk meningkatkan kapasiti belia dan skala perniagaan terutama dalam meningkatkan pendapatan sebanyak 10% setahun atau lebih selepas bantuan diterima oleh usahawan;
- iv. **Program Teman Tekun 2.0 oleh TEKUN Nasional** yang memberi manfaat kepada lebih 23,000 usahawan belia untuk meningkatkan skala perniagaan;
- v. **Program Kerjasama TEKUN Nasional dan Giatmara, IKM dan ILP** yang memberi bantuan kemahiran perniagaan kepada 400 golongan belia dan lepasan pusat latihan di seluruh negara;
- vi. **Program *Belia Fund* oleh Kementerian Belia Sukan** dengan kos sebanyak RM50 juta memberikan kemudahan pembiayaan yang disediakan oleh Agensi Pembiaya di bawah Kementerian Pembangunan Usahawan kepada usahawan belia untuk memulakan perniagaan; dan

- vii. **Program Youth Career oleh KBS** dengan kos sebanyak RM2.4 juta yang menyediakan kemudahan latihan, kemahiran dan pembiayaan untuk usahawan muda memula dan meningkatkan kapasiti perniagaan.

Sekian, terima kasih

NO. SOALAN: 10

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN
DARIPADA : TUAN LUKANISMAN BIN AWANG SAUNI
[SIBUTI]
TARIKH : 22 NOVEMBER 2018 (KHAMIS)

Tuan Lukanisman bin Awang Sauni [Sibuti] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah Kerajaan baharu akan meneruskan dasar penyeragaman harga barangan keperluan asas antara Semenanjung, Sabah dan Sarawak.

JAWAPAN:

Tuan Yang Di-Pertua,

Kerajaan telah melaksanakan Program Penyeragaman Harga semenjak dari tahun 2009 sehingga kini. Melalui Program ini, Kerajaan akan menanggung kos penghantaran barang-barang keperluan asas seperti beras, tepung gandum, minyak masak paket 1kg, gula pasir, gas petroleum cecair (gas memasak), petrol RON95 dan diesel ke kawasan pedalaman di Sabah, Sarawak dan Semenanjung. Secara prinsipnya objektif ini bertujuan membantu masyarakat di kawasan pedalaman agar dapat membeli barangan asas tersebut pada harga yang sama seperti di bandar.

Program Penyeragaman Harga akan diteruskan bagi tahun 2019 dengan peruntukan perbelanjaan sebanyak RM 150 Juta secara kesuluruhannya. Pada ketika ini terdapat sejumlah 1593 POS dengan izin **Point of Sales** di Sarawak dan 1844 POS di Sabah. Bagi tahun 2018, sejumlah RM 96.4 Juta telah diperuntukkan bagi tujuan pelaksanaan program ini di Sarawak dan RM 64.6 Juta di Sabah.

Namun begitu, melalui beberapa kajian dan penelitian yang telah dijalankan oleh pihak kementerian telah mendapati bahawa terdapat pembaziran dan juga peruntukan perbelanjaan yang tidak perlu dalam pelaksanaan program ini.

Oleh yang demikian, pihak kementerian akan melaksanakan beberapa langkah pembaharuan dan penambahbaikan ke atas pelaksanaan program ini supaya ianya dapat benar benar memberi manfaat kepada penduduk di kawasan pedalaman bagi kedua - dua negeri Sabah dan Sarawak.

Salah satu daripada langkah baharu yang akan dilaksanakan oleh pihak kementerian adalah dengan menjemput syarikat minyak supaya mendirikan lebih banyak stesyen minyak mini ataupun PCS dengan izin “Portable Container System” yang juga akan berfungsi sebagai hub atau pusat pengedaran bagi barangan perlu seperti gas LPG, minyak masak, tepung dan lain - lain bagi penduduk di kawasan pedalaman.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA,
PARLIMEN KEEMPAT BELAS,
MAJLIS MESYUARAT DEWAN RAKYAT

PERTANYAAN : LISAN

**DARIPADA : YB TUAN LARRY SOON @ LARRY SNG
WEI SHIEN [JULAU]**

TARIKH : 22 NOVEMBER 2018
MENJAWAB

SOALAN : 11

YB TUAN LARRY SOON @ LARRY SNG WEI SHIEN [JULAU] minta **PERDANA MENTERI** menyatakan apakah langkah-langkah yang akan atau sedang diambil oleh Kerajaan untuk memastikan konsep pemisahan kuasa antara badan-badan eksekutif, legislatif dan kehakiman terpelihara.

JAWAPAN: YB TUAN MOHAMED HANIPA MAIDIN

TIMBALAN MENTERI DI JABATAN PERDANA MENTERI

Tuan Yang di-Pertua,

1. Konsep pemisahan atau pengasingan kuasa merupakan suatu doktrin yang mengesyorkan pengasingan kuasa antara tiga badan iaitu badan eksekutif, badan perundangan dan badan kehakiman untuk mengelakkan berlakunya ketidakadilan sekiranya kuasa itu dipegang oleh suatu badan sahaja.
2. Doktrin pengasingan kuasa di Malaysia dijelaskan oleh Yang Amat Arif Abdul Hamid Mohamad, Presiden Mahkamah Rayuan ketika itu, dalam kes **Public Prosecutor v Kok Wah Kuan [2008] 1 MLJ 1** yang menyatakan yang berikut :

“[14] What is this doctrine of separation of powers? Separation of powers is a term coined by French political enlightenment thinker Baron de Montesquieu. It is a political doctrine under which the legislative, executive and judicial branches of government are kept distinct, to prevent abuse of power....Under the Westminster System this separation does not fully exist. The three branches exist but Ministers, for example, are both executives and legislators.....

[17] In other words we have our own model. Our Constitution does have the features of the separation of powers and at the same time, it contains features which do not strictly comply with the doctrine. To what extent the doctrine applies depends on the provision of the Constitution. A provision of the Constitution cannot be struck out on the ground that it contravenes the doctrine. Similarly no provision of the law may be struck out as

unconstitutional if it is not inconsistent with the Constitution, even though it may be inconsistent with the doctrine. The doctrine is not a provision of the Malaysian Constitution even though no doubt, it had influenced the framers of the Malaysian Constitution, just like democracy. The Constitution provides for elections, which is a democratic process. That does not make democracy a provision of the Constitution in that where any law is undemocratic it is inconsistent with the Constitution and therefore void.”.

3. Perlembagaan Persekutuan tidak memperuntukkan secara nyata konsep pengasingan kuasa antara badan eksekutif, badan perundangan dan badan kehakiman namun pengasingan kuasa antara ketiga-tiga badan ini dinyatakan secara tersirat dalam Perlembagaan Persekutuan khususnya dalam Bahagian IV iaitu Bab 3 bagi Badan Eksekutif dan Bab 4 bagi Badan Perundangan Persekutuan dan Bahagian IX bagi Badan Kehakiman.

4. Perkara 44 Perlembagaan Persekutuan memperuntukkan bahawa kuasa perundangan Persekutuan hendaklah terletak hak pada Parlimen yang hendaklah terdiri daripada Yang di-Pertuan Agong dan dua Majlis Parlimen yang dikenali sebagai Dewan Negara dan Dewan Rakyat. Sungguhpun kuasa perundangan terletak pada Parlimen namun kuasa tersebut boleh diberikan oleh Parlimen kepada badan eksekutif apabila sesuatu perundangan memperuntukkan kuasa kepada Menteri untuk membuat perundangan subsidiari.

5. Secara dasarnya, badan eksekutif tidak mempunyai kuasa dengan sendirinya untuk membuat undang-undang kecuali pada waktu darurat di bawah Fasal (2B) dan (2C) Perkara 150 Perlembagaan Persekutuan yang memberi kuasa yang luas kepada Yang di-Pertuan Agong untuk membuat ordinan darurat.

6. Selain itu, badan perundangan iaitu Parlimen juga melaksanakan fungsi kehakiman apabila Parlimen boleh menghukum ahlinya yang melakukan perbuatan yang menghina Majlis Mesyuarat dan seumpamanya. Fungsi badan kehakiman turut dilaksanakan oleh tribunal-tribunal pentadbiran yang ditubuhkan dan dianggotai oleh pegawai awam bagi mendengar dan menentukan pertikaian antara pihak-pihak. Walaubagaimana pun, perjalanan kuasa kehakiman oleh tribunal-tribunal adalah tertakluk kepada semakan kehakiman.

7. Walaupun tiada pengasingan kuasa secara mutlak yang diamalkan di Malaysia namun mekanisme pemantauan dan pengimbangan (*check and balance*) masih tetap ada dan dilaksanakan untuk mengelakkan berlakunya penyalahgunaan kuasa oleh mana-mana badan atau institusi pentadbiran termasuklah institusi pentadbiran Kerajaan melalui satu cabang perundangan yang lain yang dikenali sebagai Undang-Undang Pentadbiran (*Administrative Law*).

8. Sebagaimana yang dijelaskan oleh M.P Jain dalam bukunya *Administrative Law of Malaysia and Singapore (1997) Malayan Law Journal* di muka surat 13, undang-undang pentadbiran merangkumi struktur, kuasa dan fungsi badan pentadbiran, had kuasa badan pentadbiran, tatacara yang perlu diikuti dalam melaksanakan kuasa dan fungsi badan pentadbiran serta tatacara bagaimana kuasa tersebut dikawal termasuklah remedi kepada pihak-pihak yang merasakan haknya telah diceroboh. Pihak-pihak yang tidak berpuas hati dengan tindakan mana-mana institusi pentadbiran boleh membuat semakan kehakiman untuk mahkamah memutuskan sama ada atau tidak berlaku penyalahgunaan kuasa atau pelanggaran hak.

9. Mahkamah Persekutuan dalam kes **Semenyih Jaya Sdn Bhd v. Pentadbir Tanah Daerah Hulu Langat and another case [2017] 3 MLJ 561** telah memutuskan berhubung dengan kebebasan kehakiman dan pengasingan kuasa seperti yang berikut:

“[86] Thus to put it in perspective, the judicial power of the court resides in the Judiciary and no other as is explicit in Article 121(1) of the Constitution.

[88] The Judiciary is thus entrusted with keeping every organ and institution of the state within its legal boundary. Concomitantly the concept of the independence of the Judiciary is the foundation of the principles of the separation of powers.

[89] This is essentially the basis upon which rests the edifice of judicial power.

[90] The important concepts of judicial power, judicial independence and the separation of powers are as critical as they are sacrosanct in our constitutional framework.

[91] The concepts above have been juxtaposed time and again in our judicial determination of issues in judicial reviews. Thus an effective check and balance mechanism is in place to ensure that the Executive and the Legislature act within their constitutional limits and that they uphold the rule of law. The Malaysian apex court had prescribed that the powers of the Executive and the Legislature are limited by the Constitution and that the Judiciary acts as a bulwark of the Constitution in ensuring that the powers of the Executive and the Legislature are to be kept within their intended limit.”.

10. Sehubungan dengan itu, dirumuskan bahawa sememangnya tiada pengasingan kuasa secara mutlak yang diamalkan di Malaysia namun terdapat mekanisme pemantauan dan pengimbangan (*check and*

balance) yang terpelihara sehingga kini untuk memastikan badan eksekutif, badan perundangan dan badan kehakiman tidak menyalahgunakan kuasa yang diberikan.

Sekian, terima kasih.

**MESYUARAT KEDUA, PENGGAL PERTAMA,
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : JAWAB LISAN

**DARIPADA : DATO' SRI HAJI TAJUDDIN BIN
ABDUL RAHMAN
[PASIR SALAK]**

TARIKH : 22 NOVEMBER 2018 (KHAMIS)

SOALAN : 12

minta **MENTERI PEMBANGUNAN LUAR BANDAR** menyatakan status Perumahan Rakyat (Kg. Tersusun) di Kg Bukit Chawi, Seberang Perak.

JAWAPAN:

Tuan Yang Di-Pertua,

Untuk makluman Ahli Yang Berhormat, Projek Pemajuan Kawasan (PPK) Bukit Chawi, Daerah Kg. Gajah, Perak Tengah telah dimulakan pada 9 September 2012 dan siap sepenuhnya pada 30 April 2015.

Projek ini menyediakan penempatan bagi pemindahan 32 mangsa banjir di sekitar Kg. Bukit Chawi ke tempat yang lebih selamat dan kondusif. Projek ini dilaksanakan di atas tapak seluas 6 ekar yang disediakan oleh Pejabat Daerah dan Tanah Kg. Gajah dengan kos keseluruhan projek berjumlah RM3.4 juta.

Untuk makluman Ahli Yang Berhormat juga, Kementerian ini telah membuat penyerahan projek yang telah siap ini secara rasmi kepada Pejabat Daerah dan Tanah Kg. Gajah pada 18 Mei 2016.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

**PERTANYAAN : LISAN
DARIPADA : TUAN TAN KOK WAI
[CHERAS]
TARIKH : 22 NOVEMBER 2018 (KHAMIS)**

SOALAN NO. 13

Minta **MENTERI KESIHATAN** menyatakan peratusan Keluaran Domestik Kasar berkaitan peruntukan tahunan bagi perkhidmatan kesihatan sepanjang 5 tahun lalu dan bagaimana kualiti penjagaan kesihatan awam terjejas dengan kadar ini.

JAWAPAN

Yang di-Pertua,

Jumlah Perbelanjaan Kesihatan (*TEH*) bagi Malaysia adalah antara RM41.6 bilion hingga RM52.0 bilion sepanjang Tahun 2013-2016 iaitu antara 4.0 hingga 4.3 peratus daripada Keluaran Dalam Negara Kasar (KDNK). Daripada jumlah ini, perbelanjaan Kesihatan sektor awam adalah antara 2.1 hingga 2.2 peratus daripada KDNK. Sumber pembayaran bagi sektor awam adalah dari kerajaan persekutuan, kerajaan negeri, pihak berkuasa tempatan dan dana keselamatan social (*social security funds*).

Pertubuhan Kesihatan Sedunia (WHO) mengesyorkan supaya jumlah peruntukan kesihatan negara (Kerajaan dan swasta) sewajarnya 7% daripada KDNK bagi menjamin kualiti penjagaan kesihatan negara berkenaan. Ini bermakna peruntukan kesihatan sektor awam di Malaysia sepatutnya kini berada pada kadar 3.5% hingga 4% daripada KDNK. Kementerian Kesihatan mengakui sekiranya peruntukan kesihatan sektor awam ditingkatkan kepada 3.5% hingga 4% daripada KDNK, ia akan melibatkan penggunaan dana yang besar daripada hasil Kerajaan dan ini mungkin tidak dapat dilaksanakan dalam masa terdekat ini.

Belanjawan 2019 yang telah dibentangkan oleh YB Menteri Kewangan pada 2 November 2018 membuktikan Kerajaan amat prihatin dalam menyediakan perkhidmatan Kesihatan yang berkualiti dan mudah diperolehi oleh rakyat. Bagi perkhidmatan Kesihatan, hampir RM29 bilion (RM28.68 bilion) telah diperuntukkan dengan peningkatan sebanyak 7.8% berbanding tahun 2018. Ini adalah termasuk RM10.8 bilion bagi membaik pulih klinik dan hospital di samping pembelian ubat – ubatan dan kelengkapan.

PEMBERITAHUAN PERTANYAAN BAGI JAWAPAN LISAN
MESYUARAT KEDUA, PENGGAL PERTAMA
PARLIMEN KEEMPAT BELAS
MAJLIS MESYUARAT DEWAN RAKYAT
15 OKTOBER HINGGA 11 DISEMBER 2018

PERTANYAAN : PERTANYAAN-PERTANYAAN JAWAB LISAN

DARIPADA : DATUK ZAHIDI BIN ZAINUL ABIDIN
[PADANG BESAR]

TARIKH : 22 NOVEMBER 2018

SOALAN :

minta **MENTERI INDUSTRI UTAMA** menyatakan apakah strategi Kementerian dalam merangka peluang untuk mengeksport komoditi getah dan minyak sawit ke pasaran baharu seperti di negara Afrika dan Amerika Latin sebagai satu inisiatif tambahan pendapatan kepada negara dan juga pekebun kecil tempatan.

JAWAPAN:

Tuan Yang Di-Pertua,

Kementerian Industri Utama melalui agensi Lembaga Minyak Sawit Malaysia (MPOB), Lembaga Getah Malaysia (LGM), Majlis Minyak Sawit Malaysia (MPOC) dan Majlis Promosi Eksport Getah Malaysia (MREPC) telah memainkan peranan yang aktif dalam penyelidikan & pembangunan (R&D), menggalakkan eksport, mempromosi dan menambah baik imej industri sawit dan getah di peringkat domestik mahupun antarabangsa.

Baru-baru ini, Kementerian telah mengadakan Misi Ekonomi dan Pelaburan Sawit dan Getah ke Mesir, Maghribi dan Colombia dari 21 hingga 29 September 2018 sebagai usaha merangka peluang untuk mengeksport,

mempromosi serta menarik pelaburan komoditi serta produk sawit dan getah di Afrika Utara dan Amerika Latin.

Misi ini diketuai oleh Yang Berhormat Timbalan Menteri Industri Utama. Melalui misi ini, pertemuan dua hala telah diadakan dengan Dr. Ali Al Moselhey, Menteri Bekalan dan Perdagangan Dalam Negeri Mesir, Rkia Derham, Setiausaha Negeri Perdagangan Antarabangsa kepada Menteri Perindustrian, Pelaburan, Perdagangan dan Ekonomi Digital Maghribi dan Andres Valencia Pinzon, Menteri Pertanian dan Pembangunan Luar Bandar Colombia.

Hasil daripada pertemuan-pertemuan dua hala tersebut, ketiga-tiga negara telah menyambut baik usaha pihak Malaysia memudah cara peningkatan penggunaan produk getah dan sawit di negara-negara tersebut. ketiga-tiga negara ini juga telah menyatakan komitmen untuk terus bekerjasama mewujudkan rangkaian serta pengukuhan kerjasama dalam penyelidikan dan pembangunan berkaitan getah dan sawit. negara-negara tersebut juga mangalu-alukan syarikat-syarikat Malaysia untuk melabur dalam industri pembuatan produk getah dan produk minyak sawit di negara mereka.

Tuan Yang di-Pertua,

Selain usaha-usaha tersebut, Kerajaan juga telah mempergiatkan perbincangan dan perkongsian data serta maklumat berhubung industri sawit dan kemampuannya dengan negara-negara pengimport di seluruh dunia. Aktiviti-aktiviti lain yang telah dijalankan adalah seperti lawatan kerja, misi ekonomi dan teknikal ke negara-negara berpotensi. Seterusnya, ia akan disusuli dengan penyertaan delegasi Malaysia dalam pelbagai persidangan, ekspo perdagangan, pameran dan lain-lain. Ini bertujuan untuk berinteraksi dengan penggiat industri minyak sayuran dan lemak global serta pihak-pihak yang berkepentingan dalam industri ini bagi membuka peluang yang lebih luas kepada Malaysia untuk meningkatkan pegangan pasaran getah dan minyak sawit Malaysia di peringkat antarabangsa.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : PUAN NOR AZRINA BINTI SURIP
[MERBOK]**

TARIKH : 22 NOVEMBER 2018 (KHAMIS)

SOALAN NO. 15

PUAN NOR AZRINA BINTI SURIP minta **MENTERI AIR, TANAH DAN SUMBER ASLI** menyatakan berapakah jumlah loji rawatan air yang ada sekarang dan adakah semuanya masih berfungsi dengan baik dan berupaya menampung permintaan bekalan air setiap negeri. Apakah Kementerian melihat kembali kemampuan loji-loji rawatan air yang sudah lama terutamanya loji yang sudah wujud sejak tahun 1940an. Sebagai contoh loji rawatan air tupah yang wujud sejak tahun 1945 yang memerlukan penambahbaikan yang segera.

SOALAN NO. 15

JAWAPAN

Tuan Yang di- Pertua,

1. Berdasarkan statistik dari Malaysia *Water Industry Guide* 2018, jumlah loji yang ada di seluruh negara adalah sebanyak 508 bilangan dengan kapasiti reka bentuk berjumlah 19,763 JLH. Loji-loji ini masih berfungsi dengan baik dengan purata pengeluaran air terawat sebanyak 16,881 JLH.
2. Kementerian Air, Tanah dan Sumber Asli (KATS) sedar akan kewujudan LRA lama, di mana kemampuan loji-loji ini perlu dikaji semula dari aspek keadaan fizikal loji itu sendiri, kemampuan kapasiti pengeluaran bagi menampung kenaikan permintaan, teknologi rawatan dengan kemunculan bahan pencemar, dengan izin, *new pollutants* baharu serta kepatuhan kepada mutu air minum yang lebih ketat dan sebagainya.
3. Sehubungan dengan ini, antara fokus utama KATS dalam merangka pelan pembangunan bekalan air negara ialah kerja-kerja naik-taraf LRA sedia ada di samping pembinaan LRA baharu di seluruh

negara yang dilengkapi dengan teknologi terkini bagi menjamin kelangsungan jaminan bekal air terawat negara.

Sekian, terima kasih.

PEMBERITAHUAN PERTANYAAN BAGI JAWAB LISAN
DEWAN RAKYAT MALAYSIA

PERTANYAAN : JAWAB LISAN

**DARIPADA : DATO' SRI REEZAL MERICAN BIN
NAINA MERICAN
[KEPALA BATAS]**

TARIKH : 22 NOVEMBER 2018

SOALAN : Dato' Sri Reezal Merican bin Naina Merican [Kepala Batas] minta **MENTERI LUAR NEGERI** menyatakan dengan terperinci mengenai hubungan Malaysia dan Amerika Syarikat di bawah pentadbiran baharu Kerajaan Malaysia.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Kepala Batas atas pertanyaan yang dikemukakan.

Tuan Yang di-Pertua,

2. Izinkan saya mulakan dengan menjelaskan mengenai hubungan dua hala Malaysia dan Amerika Syarikat secara umumnya. Untuk makluman Dewan yang mulia ini, hubungan dua hala Malaysia dan Amerika Syarikat telah terjalin sejak 1957. Malaysia dan Amerika Syarikat mempunyai hubungan dua hala yang mesra serta kerjasama yang erat dalam pelbagai bidang. Malah, hubungan ini telah dipertingkatkan ke tahap Perkongsian Komprehensif (*Comprehensive Partnership*) sejak tahun 2014 dalam pelbagai bidang kerjasama utama, seperti politik, ekonomi, keselamatan, pertahanan dan sebagainya.

3. Di bawah pentadbiran Kerajaan baharu, Malaysia mengamalkan pendekatan berbaik-baik dengan semua negara, mempertahankan prinsip tidak berpihak dan berkecuali. Malaysia akan memastikan sebarang bentuk kerjasama dua hala dengan Amerika Syarikat akan dapat ditingkatkan di masa hadapan selagi mana hubungan tersebut berteraskan kepada undang-undang negara dan ketelusan demi kemaslahatan bersama.

4. Malaysia berhasrat untuk terus bekerjasama dengan Amerika Syarikat dalam arena politik, ekonomi, sosial, pendidikan, hak asasi dan amalan berasaskan *rule of law*. Hal ini dapat dilihat apabila Malaysia mengalu-alukan lawatan rasmi Setiausaha Negara Amerika Syarikat, Mike Pompeo ke Malaysia pada 3 Ogos 2018 di mana beliau turut mengadakan kunjungan hormat ke atas YAB Tun Dr. Mahathir Mohamad.

5. Walaubagaimanapun, sebagai sebuah negara yang berprinsip, Malaysia akan berpendirian teguh dalam mengutarakan pandangan negara secara berani, tegas dan bebas terutamanya dalam isu hak asasi seperti isu Palestin dan isu keselamatan seperti Laut China Selatan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 22 NOVEMBER 2018 (KHAMIS)

SOALAN NO. 17

Minta **MENTERI PENDIDIKAN** menyatakan adakah Kementerian bercadang membina sekolah-sekolah Tamil yang baharu seperti yang terkandung dalam Manifesto Pakatan Harapan dan lengkap dengan bangunan asrama.

JAWAPAN

Yang di-Pertua,

Pembinaan sekolah jenis kebangsaan Tamil (SJKT) baharu, KPM ingin menegaskan bahawa pembinaan sesebuah sekolah bergantung kepada keperluan penduduk di sesuatu kawasan serta kesediaan tapak untuk membangunkan sekolah berkenaan. Pada masa kini, bilangan SJKT di seluruh negara adalah sebanyak 525 buah yang terdiri daripada 160 buah berstatus sekolah kerajaan manakala 365 buah adalah sekolah bantuan kerajaan (SBK). Daripada 365 buah SBK tersebut sebanyak 360 buah adalah dalam kategori sekolah kurang murid.

Untuk makluman Ahli Yang Berhormat, penubuhan sekolah menengah adalah berdasarkan peruntukan di bawah seksyen 30 dan 31 Akta Pendidikan 1996 [*Akta 550*] yang memperuntukkan penubuhan sekolah menengah kebangsaan (SMK) sahaja bagi menampung keperluan pendidikan peringkat menengah untuk murid pelbagai kaum di negara ini. Sehubungan dengan itu, permohonan penubuhan Sekolah Menengah Kebangsaan Tamil (SMKT) memerlukan penelitian daripada segi keperluan berdasarkan kriteria standard penubuhan sebuah sekolah, unjuran murid, perundangan dan kemampuan kewangan Kerajaan.

KPM juga berpandangan, sekolah menengah kebangsaan sedia ada di seluruh negara masih mampu menampung keperluan pendidikan menengah untuk semua rakyat tanpa mengira kaum. Kerajaan juga sedaya upaya dalam usaha untuk memupuk perpaduan nasional dalam kalangan rakyat bermula dari peringkat sekolah justeru cadangan yang diutarakan adalah tidak selari dengan hasrat dan dasar kerajaan pada masa kini. KPM juga memberi peluang murid berbangsa India di negara ini untuk mempelajari bahasa Tamil di peringkat menengah. Mata pelajaran Bahasa Tamil turut ditawarkan sebagai mata pelajaran tambahan kepada murid yang berminat untuk mempelajari bahasa tersebut di SMK.

Sekian, terima kasih

RJM111

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK DR. JEFFREY KITINGAN
[KENINGAU]
TARIKH : 22 NOVEMBER 2018 (KHAMIS)

SOALAN NO. 18

Y.B. DATUK DR. JEFFREY KITINGAN [KENINGAU] minta **MENTERI KEWANGAN** menyatakan:-

- (a) adakah Kerajaan akan mematuhi Artikel 112c dan Bahagian IV Jadual ke-10 Perlembagaan Persekutuan dan membayar kepada Sabah 40% hasil bersih yang diperolehi dari Sabah dalam Bajet 2018, dan jika tidak, berapakah jumlah yang akan dibayar kepada Sabah sebagai hasil bersih 40% tersebut di dalam Bajet 2018; dan
- (b) adakah Kementerian bercadang membayar balik 50% daripada segala hasil yang dipungut dari Sabah seperti dalam Manifesto PRU-14 Pakatan Harapan dalam Bajet 2018.

JAWAPAN

Tuan Yang di-Pertua,

1. Untuk makluman **Y.B Keningau** dan Dewan Yang Mulia ini, pemberian khas kepada Sabah adalah termaktub dalam Perlembagaan Persekutuan sebagaimana yang diperuntukkan di bawah Perkara 112C dan disenaraikan dalam Bahagian IV dan V, Jadual Kesepuluh, Perlembagaan Persekutuan. Penetapan amaun pemberian khas adalah sebagaimana yang ditetapkan di bawah peruntukan-peruntukan berkenaan. Ia hendaklah dipersetujui oleh Kerajaan Persekutuan dan Kerajaan Negeri berkaitan.
2. Di samping itu, Kerajaan sentiasa bertanggungjawab untuk memastikan pembangunan seimbang di seluruh negara. Sehubungan itu, jumlah anggaran perbelanjaan pembangunan pada tahun 2019 secara spesifik kepada semua negeri telah meningkat kepada RM 31.73 bilion, iaitu sebanyak 13.6% daripada RM 27.92 bilion pada tahun 2018. Dari jumlah tersebut, jumlah untuk negeri Sabah telah meningkat kepada RM 5.01 bilion pada tahun 2019 (atau 15.8% daripada jumlah anggaran pembangunan mengikut negeri) daripada RM 4.13 bilion pada tahun 2018 (atau 14.8% daripada jumlah anggaran pembangunan mengikut negeri). Peruntukan untuk pembangunan negeri Sabah sebanyak RM 5.01 bilion dalam Belanjawan 2019 ini merupakan peningkatan sebanyak 21.3% berbanding pada tahun 2018. Perlu ditegaskan bahawa jumlah perbelanjaan pembangunan yang diperuntukkan bagi negeri Sabah telah meningkat kepada 15.8% berbanding dengan negeri-negeri lain dan bukannya 9% sepertimana yang difitnah oleh pihak yang tidak bertanggungjawab.

3. Kerajaan Persekutuan akan sentiasa cuba memenuhi tuntutan dan hak Kerajaan Negeri selaras dengan Perlembagaan Persekutuan. Namun demikian, ia tertakluk kepada kemampuan dan kedudukan hasil Kerajaan. Perkara ini juga telah dijelaskan oleh Yang Amat Berhormat Perdana Menteri semasa beliau mempengerusikan Majlis Kewangan Negara pada 7 Jun 2018. Untuk itu, selaras dengan Teras 4 Buku Harapan, Mesyuarat Jemaah Menteri pada 5 September 2018 telah bersetuju dengan penubuhan Jawatankuasa Khas Kabinet untuk menyemak Perjanjian Malaysia 1963 dan membuat pengesyoran kepada Kerajaan Persekutuan berhubung dengan pelaksanaan hak dan autonomi Sabah dan Sarawak.
4. Jawatankuasa Khas Kabinet untuk menyemak Perjanjian Malaysia 1963 dilaksanakan melalui tiga peringkat iaitu Jawatankuasa Pemandu, Jawatankuasa Teknikal dan Jawatankuasa Kerja yang masing-masing dipengerusikan oleh YAB Perdana Menteri, YB Menteri di Jabatan Perdana Menteri (Undang-Undang) dan pakar-pakar bidang tertentu.
5. Jawatankuasa ini akan memberi keutamaan kepada prinsip keadilan dan kesaksamaan bagi memastikan semua pihak mendapat keadilan seperti yang diperuntukkan di sisi undang-undang negara demi menegakkan "*rule of law*" di negara kita. Isu ketidakseimbangan pembangunan fizikal dan sosio-ekonomi di antara negeri-negeri di Semenanjung Malaysia berbanding negeri Sabah dan Sarawak akan dapat diberikan penekanan yang lebih serius. Ini sekaligus akan dapat membantu Kerajaan Persekutuan dalam merangka pelan pembangunan ekonomi yang lebih holistik, yang mampu merapatkan jurang ekonomi serta adil dan sama rata di antara negeri-negeri Malaysia. Akan tetapi sebarang cadangan atau formula yang disyorkan mestilah tertakluk kepada kedudukan kewangan mengizinkan yang kini terdesak ekoran skandal kewangan 1MDB yang didokong oleh kerajaan lama.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATIN PADUKA DR. TAN YEE KEW
[WANGSA MAJU]
TARIKH : 22 NOVEMBER 2018 (KHAMIS)

SOALAN NO. 19

Y.B. DATIN PADUKA DR. TAN YEE KEW [WANGSA MAJU] minta **MENTERI KEWANGAN** menyatakan kelewatan tuntutan (bayaran lebih masa) bagi kakitangan Kerajaan B40 yang tidak seharusnya disekat kerana mereka bukannya berpendapatan tinggi. Kenapa terdapat tuntutan bayaran elaun kerja lebih masa yang tertangguh sehingga 1 hingga 2 bulan lamanya.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan telah membelanjakan sebanyak RM1,142,519,018 pada tahun 2017 untuk bayaran elaun kerja lebih masa dan sehingga 16 Oktober 2018 sebanyak RM916,222,862 telah dibelanjakan daripada keseluruhan peruntukan yang telah diagihkan sehingga Oktober 2018 iaitu sebanyak RM1,449,365,380.

Manakala kelulusan tuntutan dan bayaran (elaun lebih masa) pegawai kerajaan adalah di bawah kawalan Pegawai Pengawal (Kementerian) di mana pegawai bertugas. Semua baucar bayaran bagi sebarang tuntutan/bayaran yang telah disedia dan diluluskan oleh Kementerian/Jabatan/Pusat Tanggungjawab akan dibayar oleh Pejabat Perakaunan (Jabatan Akauntan Negara Malaysia) dalam tempoh 4 hari kalendar dari tarikh terima dokumen lengkap.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : Lisan

DARIPADA : Dato' Sri Ikmal Hisham bin Abdul Aziz
[Tanah Merah]

TARIKH : 22 November 2018 (Khamis)

SOALAN NO. 20

Minta **MENTERI PERTANIAN DAN INDUSTRI ASAS TANI** menyatakan sejauh manakah seriusnya masalah lambakan cili dan sayuran-sayuran dari luar negara sehingga ia menjejaskan petani-petani tempatan.

JAWAPAN

Tuan Yang Dipertua,

Kementerian Pertanian dan Industri Asas Tani sentiasa memantau situasi pasaran sayuran-sayuran dalam negara bagi memastikan bekalan yang mencukupi di samping tidak menjejaskan petani tempatan. Pada masa kini, pengeluaran sayur-sayuran dalam negara masih tidak mampu untuk memenuhi keperluan pasaran. Sebagai contoh, pengeluaran cili tempatan pada tahun 2017 sebanyak 27 ribu tan metrik hanya mampu memenuhi 37% daripada permintaan cili di pasaran manakala baki sebanyak 63% lagi iaitu 47 ribu tan perlu diimport. Bagi tahun 2018, pengeluaran cili tempatan sehingga bulan September adalah sebanyak 17,459 tan manakala data MAQIS menunjukkan bahawa jumlah import adalah sebanyak 37 ribu tan.

Dalam hal ini, Kementerian Pertanian dan Industri Asas Tani melalui agensinya sedang dan akan mengambil langkah-langkah yang berterusan dalam memastikan cili dan sayur-sayuran tempatan mampu bersaing di pasaran dari segi keselamatan, kualiti dan harga. Antara langkah tersebut adalah mengawal pengimportan sayur-sayuran dengan memastikan hanya sayur-sayuran yang mematuhi prosedur Sanitasi dan Fitosanitasi (SPS) serta bebas penyakit dan paras sisa baki racun sahaja dibenarkan untuk memasuki pasaran tempatan.

Kementerian juga akan memantau impak dan kesan pengimportan cili dan produk sayur-sayuran lain ke atas pengusaha tempatan dari semasa ke semasa bagi membolehkan tindakan diambil selaras dengan peraturan dan komitmen perdagangan antarabangsa sekiranya pengimportan tersebut menjejaskan pengusaha tempatan.

Selain itu, Kementerian juga akan terus menjalankan kempen kesedaran mengenai kelebihan sayur-sayuran tempatan khususnya cili tempatan kepada pengguna di pasaraya besar dan outlet-outlet peruncitan.

**PEMBERITAHUAN PERTANYAAN LISAN DEWAN RAKYAT,
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

DARIPADA : DATO' SERI DR SANTHARA [SEGAMAT]

TARIKH : 22 NOVEMBER 2018 (KHAMIS)

SOALAN: 21

Minta **MENTERI PENDIDIKAN** menyatakan berapakah jumlah keseluruhan dana yang telah diberikan oleh Kerajaan kepada Asia E Universiti (AEU) dan Lim Kok Wing Universiti serta apakah syarat-syarat dan terma yang dipersetujui, serta nyatakan siapakah pemegang saham bagi kedua-dua universiti tersebut.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Pendidikan Malaysia tidak membuat penyaluran peruntukan bagi tujuan pengoperasian institusi pendidikan tinggi swasta (IPTS). IPTS merupakan suatu syarikat yang berdaftar di bawah Akta IPTS (Akta 555) dan menjana sumber pendapatan sendiri melalui beberapa kaedah seperti yuran pengajian, sewaan dan sebagainya.

Untuk makluman Ahli Yang Berhormat juga, pemegang saham bagi Asia E University ialah Ybhg. Dato Ansary bin Ahmed dan Encik Hairudin bin Harun. Manakala pemegang saham *Lim Kok Wing University of Creative Technology* adalah *Limkokwing Institute of Creative Technology Sdn. Bhd*, Warga Cemerlang Sdn. Bhd, YBhg. Tan Sri Dato' Paduka Lim Kok Wing, YBhg. Dato' Lim Kok Wing JR dan YBhg. Dato' Tiffanee Marie Lim.

PEMBERITAHUAN PERTANYAAN
DEWAN RAKYAT MALAYSIA
MESYUARAT KEDUA, PENGGAL KELIMA

PERTANYAAN : LISAN
DARIPADA : DATUK SERI IR. DR. WEE KA SIONG
KAWASAN : AYER HITAM
TARIKH : 21 NOVEMBER 2018

SOALAN

Datuk Seri Ir. Dr. Wee Ka Siong [Ayer Hitam] minta MENTERI PERDAGANGAN ANTARABANGSA DAN INDUSTRI menyatakan status terkini FDI ke Malaysia yang semakin merudum. Apakah penemuan dan cadangan mitigasi yang bakal dibentangkan oleh jawatankuasa konflik perdagangan US-China ditubuhkan oleh Kementerian memandangkan konflik semakin menular dengan tarif import tambahan yang lebih tinggi.

JAWAPAN

Tuan Yang Dipertua,

1. Secara dasarnya, Malaysia sentiasa menjadi antara destinasi pelaburan utama bagi pelabur-pelabur asing. Kedudukan Malaysia yang strategik serta persekitaran perniagaan yang kondusif menyebabkan Malaysia terus dilihat sebagai sebuah negara yang kompetitif dan berdaya saing. Setakat suku kedua 2018, kedudukan pelaburan langsung asing (FDI Stock) telah direkodkan sebanyak RM590 juta. Ini merupakan peningkatan sebanyak 6%, berbanding tempoh yang sama tahun lalu.

NO. SOALAN : 22

2. Bagi tempoh tersebut, pecahan kedudukan pelaburan langsung asing (FDI Stock) ke Malaysia adalah seperti berikut:
 - Pembuatan sebanyak RM251.2 juta;
 - Perkhidmatan sebanyak RM283.2 juta;
 - Perlombongan sebanyak RM38.0 juta;
 - Pembinaan sebanyak RM9.2 juta; dan
 - Pertanian, perhutanan dan perikanan sebanyak RM8.7 juta.
3. Data tersebut jelas menunjukkan bahawa meskipun persekitaran ekonomi pada ketika ini agak mencabar, Malaysia terus kekal kukuh sebagai sebuah destinasi pelaburan pilihan bagi pelaburan asing. Kerajaan melalui agensi-agensi berkaitan seperti Lembaga Pembangunan Pelaburan Malaysia (MIDA) akan sentiasa berkerja keras begi memastikan aspirasi kerajaan hari ini dapat dicapai dengan jayanya.

Tuan Yang Dipertua,

4. MITI dan agensi melalui pejabat di luar negara di AS dan RRC juga akan terus memantau perkembangan berkaitan perang perdagangan ini. Antaranya, dari semasa ke semasa akan menilai perkembangan konflik perdagangan yang mempengaruhi aliran perdagangan antara Malaysia dan AS serta Malaysia dan RRC.
5. Pasukan petugas khas konflik perdagangan US-China (*the US-China Taskforce on Trade Conflict*) [dengan izin] kini sedang dalam proses menjalankan soal selidik bersama-sama industri bagi mendapatkan maklum balas dalam merumuskan strategi untuk menangani konflik perdagangan Malaysia.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

DARIPADA : YB TUAN AHMAD FAHMI BIN MOHAMED FADZIL

TARIKH : 22 NOVEMBER 2018 (KHAMIS)

SOALAN : 23

PR-1412-L02044

Tuan Ahmad Fahmi bin Mohamed Fadzil (Lembah Pantai) minta **PERDANA MENTERI** menyatakan langkah-langkah reformasi institusi yang akan diambil Kerajaan untuk memastikan Parlimen Malaysia menjadi institusi yang benar-benar bebas dari pengaruh eksekutif.

JAWAPAN: YB TUAN MOHAMED HANIPA MAIDIN

**TIMBALAN MENTERI DI JABATAN PERDANA
MENTERI**

Tuan Yang di-Pertua,

Untuk makluman Ahli Yang Berhormat,

Selaras dengan Manifesto Pakatan Harapan melalui Janji 16 : Mengembalikan Wibawa Institusi Parlimen, Kerajaan sedang mengkaji dengan teliti cadangan langkah-langkah untuk melaksanakan reformasi

Parlimen bagi menjadikan institusi Parlimen bebas dari pengaruh eksekutif. Antara langkah yang sedang dikaji untuk dilaksanakan adalah untuk mengwujudkan Akta Suruhanjaya Perkhidmatan Parlimen.

Manakala, langkah-langkah atau cadangan yang telah dilaksanakan adalah membentuk enam (6) Jawatankuasa Pilihan Khas sebagai perintis berdasarkan kepentingan dan hala tuju negara serta melantik pembangkang sebagai Pengerusi Jawatankuasa Kira-Kira Wang Negara (PAC).

Untuk makluman Ahli Yang Berhormat, sebarang cadangan langkah-langkah reformasi Parlimen memerlukan kajian yang lebih terperinci agar ia dapat mencapai matlamatnya dan perlu dibawa ke Jawatankuasa Dewan, Majlis Dewan Rakyat Parlimen Keempat Belas bagi membincangkannya seterusnya mempertimbangkannya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN ROBERT LAWSON CHUAT
[BETONG]**

TARIKH : 22 NOVEMBER 2018 (KHAMIS)

SOALAN NO. : 24

Minta **MENTERI PERTANIAN DAN INDUSTRI ASAS TANI** menyatakan:

- i. apakah perancangan Kementerian untuk meningkatkan pendapatan petani, penternak dan nelayan di luar bandar; dan
- ii. apakah tindakan Kementerian bagi menjamin segala hasil keluaran petani luar bandar dapat dipasarkan.

JAWAPAN

Tuan Yang di-Pertua,

Bagi meningkatkan pendapatan petani, penternak dan nelayan di luar bandar, Kementerian Pertanian dan Industri Asas Tani melalui Jabatan dan agensi di bawahnya telah melaksanakan program-program peningkatan produktiviti yang berupaya menjana pendapatan kumpulan sasar seperti berikut:

- i) Dalam aspek pengeluaran, menggalakkan dan mempergiatkan keterlibatan petani, penternak dan nelayan dalam program-program khusus. Bagi sektor tanaman, antara program berkaitan adalah seperti Taman Kekal Pengeluaran Makanan (TKPM), Pembangunan Kluster Tanaman, Tanaman Semula Buah-buahan Terpilih, Pembangunan Ladang Organik, Ekonomi Gantian Tembakau dan Pembangunan Tanah Terbiar. Bagi sektor ternakan, pembangunan kawasan *homeplot* dilaksanakan bagi sumber makanan ternakan; manakala bagi sektor perikanan pula bantuan diberikan bagi penambahbaikan vesel dan alat penangkapan ikan sedia ada kepada teknologi baru yang mesra sumber bagi meningkatkan produktiviti penangkapan ikan oleh nelayan. Selain itu, nelayan juga digalakkan terlibat dalam aktiviti akuakultur secara kluster bagi meningkatkan pengeluaran dan mewujudkan jaminan pasaran.
- ii) Dalam aspek pemindahan teknologi, disediakan khidmat pengembangan berteraskan Amalan Pertanian Baik iaitu myGAP dan myOrganic di sepanjang rantai nilai bagi meningkatkan produktiviti, pengeluaran dan pendapatan serta memastikan pengeluaran bahan makanan yang mencukupi, berkualiti dan selamat dimakan. Pelaksanaan program pembiakan melalui kaedah permanian beradas (*Artificial Insemination*) dalam sektor ternakan bagi meningkatkan kuantiti daging untuk setiap ekor lembu; serta pemeraksanaan penggunaan teknologi ICT dalam sektor perikanan dengan aplikasi pangkalan data berpusat serta pusat kawalan dan pemantauan vesel diperkenalkan bagi meningkatkan produktiviti;

- iii) Dalam aspek kemahiran, latihan disediakan bagi peningkatan kecekapan produktiviti, kawalan penyakit selain memperkasakan kemahiran nelayan-nelayan tempatan melalui latihan pengendalian vesel dan alat penangkapan ikan bagi mengurangkan kebergantungan kepada pekerja asing;
- iv) Mempergiatkan industri pemprosesan asas tani sebagai aktiviti yang memberi nilai tambah kepada hasil pertanian. Sehingga kini seramai 8,807 usahawan telah terlibat dalam pelbagai jenis kategori perniagaan antaranya snek & makanan ringan, hasil sejuk beku, hasil buah-buahan, hasil kelapa, dan bakeri dengan nilai pengeluaran yang telah dicatatkan pada tahun 2017 adalah sebanyak RM1.04 billion. Selain itu, aktiviti ekonomi nelayan juga diperkukuhkan melalui penglibatan persatuan nelayan dalam semua rangkaian sistem hulu dan hilir aktiviti perikanan;
- v) Penyediaan bantuan / subsidi / insentif bagi meningkatkan pengeluaran misalnya pemberian bantuan ternakan, program baik pulih kandang dan pemberian mesin perincih; serta insentif seperti pendaratan ikan, bantuan elaun sara hidup nelayan dan skim subsidi minyak bagi membantu menampung sebahagian kos penangkapan ikan; dan
- vi) Pewujudan program khusus bagi belia iaitu Program Agropreneur Muda yang memberi ruang kepada golongan muda luar bandar untuk turut terlibat dalam aktiviti pertanian. Sehingga Ogos 2018, sebanyak 21,768 belia telah terlibat dalam program ini.

Kementerian melalui Jabatan dan Agensi di bawahnya turut mengambil tindakan bagi menjamin hasil keluaran petani termasuk petani di luar bandar dapat dipasarkan melalui usaha berikut:

- i) Membangunkan Program Ladang Kontrak yang mana penyertaan petani dalam program ini akan memberi jaminan pasaran ke atas produk yang dikeluarkan melalui perjanjian jual beli (*forward agreement*) yang dipersetujui bersama di antara petani dengan pihak FAMA;

- ii) Program Pengukuhan Bekalan Ladang kontrak MOA ke Pasaran (KUKUH) bagi mengurangkan perantara pasaran di dalam rantai pemasaran dengan menemukan pengeluar (peserta Ladang Kontrak) dengan pemasar bagi memastikan lebih banyak hasil ladang dapat disalurkan secara terus kepada pengguna melalui akses Pasar Tani, Gerai Buah-Buahan Segar (GBBS), Agrobazar dan outlet runcit FAMA; dan
- iii) Menggalakkan petani termasuk petani dari luar bandar untuk menjual secara terus ke pasaran melalui platform-platform luang pasaran langsung yang telah dibangunkan FAMA antaranya Pasar Tani, MyFarm Outlet dan juga program Jualan Terus Dari Ladang (JTDL).

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 22 NOVEMBER 2018 (KHAMIS)

SOALAN NO. 25

Minta **MENTERI PERUMAHAN DAN KERAJAAN TEMPATAN** menyatakan langkah yang akan diambil oleh pihak Kementerian terhadap projek perumahan yang terbengkalai di seluruh negara.

JAWAPAN

Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) memandang serius permasalahan berkaitan projek perumahan swasta terbengkalai tidak kira sama ada di kawasan luar bandar mahupun di bandar. Justeru, KPKT telah mengambil beberapa inisiatif untuk menangani masalah serta membantu para pembeli projek perumahan swasta terbengkalai seperti berikut:
 - i. Mengenal pasti pemaju-pemaju yang berkeupayaan dan berpengalaman (*white knight*) untuk mengambil alih pemulihan projek perumahan swasta terbengkalai;
 - ii. Melaksanakan pemulihan projek-projek perumahan swasta terbengkalai terutamanya kategori kos rendah dan kos sederhana rendah melalui peruntukan yang disediakan oleh Kerajaan Persekutuan. Peruntukan ini adalah bagi menampung kos tambahan pemulihan projek-projek tersebut. Dari tahun 2009 sehingga 30 September 2018, sebanyak RM219.793 juta telah dibelanjakan bagi menampung kos pemulihan sebanyak 32 buah projek perumahan terbengkalai yang memanfaatkan seramai 5,079 orang pembeli rumah;
 - iii. Menjalinkan kerjasama dengan Jabatan Insolvensi Malaysia/ pelikuidasi swasta bagi membantu memulihkan projek perumahan terbengkalai. Kementerian bertindak sebagai *mediator* bagi membantu pelikuidasi dan kontraktor penyelamat untuk berhubung dengan Pihak Berkuasa Tempatan (PBT), agensi teknikal serta pihak pembiaya (institusi kewangan);
 - iv. Mengenakan tindakan pendakwaan dan kompaun ke atas pemaju-pemaju yang tidak mematuhi peruntukan dan peraturan yang terkandung di dalam Akta Pemajuan Perumahan (Kawalan dan Pelesenan) 1966 [Akta 118];

- v. Menyenarai hitam pemaju-pemaju yang menyebabkan projek perumahan terbengkalai, pemaju-pemaju terlibat dengan projek sakit, pemaju-pemaju gagal membayar kompaun, pemaju-pemaju ingkar award Tribunal Tuntutan Pembeli Rumah dan pemaju-pemaju perumahan tanpa lesen. Apabila di senarai hitam, pemaju dan ahli lembaga pengarah syarikat terbabit tidak boleh memohon lesen dan permit iklan dan jualan yang sedia ada. Senarai pemaju-pemaju yang disenarai hitam juga dipaparkan dalam laman sesawang KPKT untuk rujukan pembeli dan *stakeholders* yang lain;
- vi. Membuat pindaan kepada Akta 118 yang telah dikuatkuasakan bersekali dengan Akta Pengurusan Strata 2013 (Akta 757) dan Akta Hakmilik Strata (Pindaan) 2013 (Akta 318) bermula 1 Jun 2015. Pindaan kepada Akta 118 dan peraturan-peraturan adalah seperti berikut:-
 - a) Seksyen 3:
Tafsiran pemaju perumahan merangkumi pihak pelikuidasi dan pegawai penerima.
 - b) Seksyen 6:
Deposit lesen pemajuan perumahan dipinda dari RM200,000.00 kepada 3% daripada anggaran kos pembinaan termasuk kos yuran profesional tetapi tidak termasuk kos tanah.
 - c) Seksyen 7B:
Bagi maksud seksyen 7, 8, 8A, 11 dan 12, pemaju perumahan berlesen termasuk mana-mana pemaju perumahan yang lesennya telah tamat.
 - d) Seksyen 8:
Pembeli boleh secara individu memohon untuk menamatkan perjanjian jual beli pada bila-bila masa sekiranya tiada kemajuan pembinaan secara berterusan di tapak pembinaan selama 6 bulan atau lebih selepas perjanjian ditandatangani dengan syarat perlu mendapat perakuan daripada Pengawal

NO SOALAN : 25

Perumahan dan mendapat persetujuan bertulis daripada pihak pembiayaan.

- e) Subseksyen 16AD(1) [Tribunal bagi tuntutan pembeli rumah]:
Kadar penalti dinaikkan kepada tidak kurang daripada RM10,000.00 tetapi hendaklah tidak melebihi RM50,000.00.
 - f) Subseksyen 24(2) [Kuasa untuk membuat peraturan-peraturan]:
Kadar penalti maksimum dinaikkan bagi kesalahan di bawah peraturan daripada RM20,000.00 kepada RM50,000.00.
 - g) Seksyen 18A (Fasal Baru):
Tindakan pendakwaan terhadap pemaju perumahan berlesen yang menyebabkan projek perumahan terbengkalai.
2. Dalam masa yang sama, bagi membantu meringankan beban para pembeli yang terbabit dengan projek perumahan swasta terbengkalai, KPKT turut mengambil inisiatif seperti berikut:
- i. Mengeluarkan surat pengesahan projek perumahan swasta terbengkalai kepada pembiayaan akhir (*end-financier*) bagi unit rumah berkaitan;
 - ii. Melalui surat pengesahan ini, para pembeli boleh mendapatkan kemudahan-kemudahan seperti berikut:-
 - a) Memohon pertimbangan daripada institusi perbankan bagi sebarang permohonan pengurangan kadar faedah dan penstrukturan semula pinjaman perumahan;
 - b) Memohon pertimbangan daripada Kumpulan Wang Simpanan Pekerja (KWSP) bagi permohonan pengeluaran kali kedua;
 - c) Bagi pembeli yang membuat pinjaman perumahan Kerajaan pula, mereka boleh mendapatkan kemudahan sama ada pertimbangan untuk:-

NO SOALAN : 25

- i. Membatalkan pinjaman sedia ada dan diberi peluang untuk memohon pinjaman baru iaitu pinjaman penuh seperti pinjaman pada kali pertama; atau
- ii. Diberi pertimbangan untuk menangguhkan kenaikan faedah pinjaman pada kadar 4% sepanjang tempoh projek dipulihkan atau selama 5 tahun (mana-mana yang terdahulu).

Walau bagaimanapun, semua perkara di atas adalah tertakluk kepada penilaian institusi pembiaya ke atas peminjam-peminjam berdasarkan merit setiap kes.

3. Untuk makluman Yang Berhormat, Kerajaan juga telah melanjutkan pengecualian duti setem ke atas perjanjian pinjaman dan surat cara pindahmilik kepada pembeli asal projek perumahan swasta terbengkalai untuk tempoh 3 tahun lagi sehingga 31 Disember 2020. Inisiatif ini telah diperkenalkan sejak tahun 2013 bagi membantu meringankan bebanan para pembeli yang terbabit dengan projek perumahan swasta terbengkalai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DATO' TUAN IBRAHIM BIN TUAN
MAN [KUBANG KERIAN]
TARIKH : 22 NOVEMBER 2018 (KHAMIS)

SOALAN NO. 26

minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan apakah langkah-langkah Kementerian untuk meningkatkan dan membina teknologi AI (*Artificial Intelligence*) menggunakan syarikat-syarikat mereka cipta IC (*Integrated Circuit*) tempatan.

JAWAPAN

Tuan Yang di-Pertua,

Selaras dengan mandat yang diberikan oleh Kerajaan kepada Tenaga, Sains, Teknologi, Alam Sekitar Dan Perubahan Iklim (MESTECC) selaku peneraju kepada agenda Sains, Teknologi dan Inovasi (STI) negara, MIMOS Berhad iaitu agensi di bawah MESTECC berperanan sebagai pelaksana penyelidikan gunaan dan pemindahan teknologi dalam ICT dan mikroelektronik. MIMOS telah membantu industri dalam dua bidang tumpuan iaitu membangunkan Industri Rekabentuk *Integrated Circuit* (IC) tempatan dan bidang *Artificial Intelligence* (AI).

Namun begitu, hendak dimaklumkan bahawa agensi MIMOS kini dalam proses peralihan kepada Kementerian Perdagangan Antarabangsa dan Industri (MITI). Tempoh peralihan ini akan berlangsung sehingga 30 November 2018.

Pada masa ini, banyak teknologi adalah berlandaskan kepada algoritma perisian (*software algorithms*) dan telah mencapai tahap kematangan yang tertentu (*reaching a certain maturity level*). Pembangunan teknologi di masa hadapan akan memerlukan pengiraan dan pemprosesan yang lebih cepat (*faster computation and processing*) bagi membolehkan ianya diaplikasikan secara lebih meluas. Sehubungan dengan itu, terdapat keperluan kepada kebolehan AI berdasarkan mikrocip (*microchip-based AI capabilities*) di mana rekaan *integrated circuit* (IC) akan meletakkan berjuta transistor dalam cip tunggal iaitu evolusi dari *Very Large Scale*

Integration (VLSI) kepada *Ultra Large Scale of Integration* (ULSI) di masa hadapan untuk menambah kelajuan pemprosesan serta kepintaran dalam peranti alatan.

Tuan Yang di-Pertua,

Dalam bidang ini, MIMOS menerusi kemudahan bersama (*shared facilities*) di MIMOS dan pereka-pereka IC, bekerjasama rapat dengan syarikat rekabentuk IC tempatan dalam pembangunan harta intelek (*intellectual property*, IP) AI Microchip untuk dikomersialkan melalui syarikat-syarikat fabrikasi global. Penghasilan IP ini sedang dan telah memberi sumbangan dalam pembangunan pelbagai sistem oleh syarikat-syarikat teknologi tempatan dan global seperti Qualcomm, Google, Amazon dan Huawei.

Di samping itu, MIMOS turut menyediakan kemudahan, infrastruktur dan kepakaran kepada syarikat SME tempatan untuk menyokong dan memudahkan usaha mereka dalam membangunkan sistem AI pada cip (*AI System on Chip*), seperti dalam bidang pengesanan manusia (*human detection*) untuk bandar pintar, kereta autonomus (*autonomous car*) dan sistem kawalan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. HAJI ABD. LATIFF BIN
AHMAD
[MERSING - BN]**

TARIKH : 22 NOVEMBER 2018 (KHAMIS)

SOALAN NO. 27

Minta **MENTERI BELIA DAN SUKAN** menyatakan :-

- (a)apakah bentuk program Kementerian untuk memupuk semangat patriotik dan jati diri di kalangan remaja setelah PLKN yang dimansuhkan ; dan
- (b)apakah status di kalangan staf JLKN termasuk anggota ATM setelah PLKN dimansuhkan. Apakah insentif yang disediakan oleh Kerajaan kepada pengusaha kem latihan PLKN setelah ditamatkan kontrak.

JAWAPAN

Yang di-Pertua,

1. Untuk makluman Ahli Yang Berhormat, berdasarkan Laporan Penilaian “Outcome” Indeks Belia Malaysia 2016 dan 2017 yang dikeluarkan oleh Institut Penyelidikan Pembangunan Belia Malaysia (IYRES), Indikator Patriotisme anak muda berada pada tahap kurang memuaskan dan mengalami penurunan skor sebanyak 2.1 skor daripada 61.58 pada tahun 2016 kepada 59.48 pada tahun 2017. Begitu juga Domain Pembangunan Kendiri yang menggambarkan sahsiah dan jati diri belia berada pada tahap sederhana dan turut mengalami penurunan skor daripada 73.80 pada tahun 2016 kepada 72.19 pada tahun 2017. Dapatan ini juga selaras dengan Laporan Kajian Impak Program Latihan Khidmat Negara (PLKN) 2016 mendapati skor bagi Domain Pembangunan Kendiri dalam kalangan peserta PLKN pada tahun 2016 adalah 75.31 dan ia berada pada tahap memuaskan.
2. Sehubungan itu, Kementerian Belia dan Sukan (KBS) sedang merangka program baru bagi menggantikan program PLKN dan BTN. Program ini dirangka secara holistik dengan menggabungkan aktiviti *indoor* dan *outdoor* berimpak tinggi untuk menyerlahkan potensi anak muda sebagai rakan strategik dalam membangunkan negara berpandukan Perlembagaan Persekutuan dan Rukun Negara. Program ini akan memantapkan elemen seperti berikut:
 - I. Bina Semangat
 - II. Pembinaan Karakter/ Perwatakan
 - III. Integrasi Nasional
 - IV. Kenegaraan dan Jati Diri
 - V. Sosialisasi Politik

3. Untuk makluman ahli Yang Berhormat, KBS sedang menjalankan program perintis yang mengadaptasi Model *Youth Adventurous Course Outward Bound* yang menerapkan nilai kepimpinan, jati diri dan kenegaraan bermula November 2018 sehingga Disember 2018 yang melibatkan enam kohort. Kohort pertama melibatkan 30 orang belia berumur 15 sehingga 17 tahun telahpun dilaksanakan pada 1 sehingga 10 November 2018 di Kem Outward Bound Malaysia (OBM) Lumut, Perak. Bagi Kohort kedua dan ketiga akan melibatkan 690 peserta akan dilaksanakan pada bulan November dan Disember 2018 bertempat di Kem Outward Bound Malaysia (OBM) Lumut, Perak dan Outward Bound (OB) Kinarut, Sabah. Manakala bermula Kohort keempat iaitu pada bulan Disember, program ini akan dilaksanakan di beberapa buah Kem Bina Negara BTN dan Kompleks Rakan Muda di bawah KBS di Semenanjung Malaysia dan di Sarawak melibatkan 1,310 orang peserta. Jumlah keseluruhan peserta yang akan terlibat dengan projek rintis ini adalah seramai 2,000 orang peserta.
4. Segala dapatan dari kesemua siri pelaksanaan program perintis ini yang melibatkan empat kohort ini akan dijadikan panduan serta rujukan untuk merangka dan seterusnya melaksanakan program baru yang akan dilaksanakan secara menyeluruh bermula tahun 2019

Yang di-Pertua,

5. Berkaitan dengan status Pegawai dan Kakitangan JLKN dan BTN, seramai 393 orang pegawai dan kakitangan awam lantikan tetap di JLKN terlibat dalam penstrukturan semula JLKN. Pegawai dan kakitangan ini dalam proses penempatan di kementerian-kementerian dan agensi kerajaan bersesuaian dengan skim perkhidmatan masing-masing. Penjawat awam dari kalangan Angkatan Tentera Malaysia telah dikembalikan kepada Kementerian Pertahanan untuk penempatan semula.

SOALAN NO : 27

6. Bagi status pegawai dan kakitangan kontrak, terdapat seramai 2,127 orang pegawai dan kakitangan JLKN yang akan tamat kontrak perkhidmatan mereka pada 31 Disember 2018.
7. Kerajaan juga tidak bercadang menyediakan insentif kepada pengusaha kem latihan PLKN setelah ditamatkan kontrak. Ia merujuk kepada perjanjian kontrak pada Klausula 36 - Penamatan Kontrak Atas Kepentingan Negara.
8. Di sini dapat dirumuskan bahawa penstrukturan dan penjenamaan semula kedua-dua program ini adalah bagi mengintegrasikan inisiatif Kerajaan dengan memperkenalkan satu pendekatan baharu yang mempunyai kekuatan bagi menyerlahkan potensi belia masa hadapan golongan belia. Belia merupakan penentu masa depan negara yang akan menjamin keamanan dan kestabilan serta kelangsungan negara. Transisi belia-dewasa adalah signifikan kepada pembangunan negara di masa depan. Oleh itu, terdapatnya keperluan untuk menentukan pendekatan yang lebih sistematik ke arah transisi belia-dewasa yang lebih positif berasaskan keperluan kelompok umur. Kestabilan politik, sosial, ekonomi, keamanan dan kestabilan negara perlu dipertahankan oleh generasi belia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI AHMAD AMZAD BIN MOHAMED
@ HASHIM
[KUALA TERENGGANU]**

TARIKH : 22 NOVEMBER 2018 (KHAMIS)

SOALAN NO.28

Minta **MENTERI HAL EHWAL EKONOMI** menyatakan apakah mekanisme Kerajaan untuk mengotakan janji membayar royalti petroleum kepada negeri-negeri pengeluar dari hasil pengeluaran mengikut Akta Pembangunan Petroleum 1974.

JAWAPAN

Yang di-Pertua,

Sepertimana Ahli Yang Berhormat sedia maklum, Mesyuarat Pertama, Penggal Pertama Parlimen Keempat Belas yang lalu semasa penggulungan perbahasan menjunjung kasih Titah Seri Paduka Baginda Yang Di-Pertuan Agong pada 1 Ogos 2018, saya telah menyatakan mengenai bayaran tunai (*cash payment*) atau lebih dikenali sebagai royalti minyak dalam Dewan yang mulia ini.

Saya juga telah menyatakan bahawa Kerajaan bercadang untuk menubuhkan Jawatankuasa Khas Kabinet yang dianggotai oleh wakil-wakil daripada Semenanjung, Sabah dan Sarawak yang mempunyai kepakaran dalam hal-hal berkaitan bertujuan untuk menyemak, mengkaji dan menambahbaik secara adil Perjanjian Malaysia 1963.

Sukacita saya maklumkan bahawa Mesyuarat Jemaah Menteri pada 5 September 2018 telah bersetuju dengan penubuhan Jawatankuasa Khas Kabinet bagi menyemak dan membuat pengesyoran kepada Kerajaan berhubung pelaksanaan hak-hak dan autonomi Sabah dan Sarawak selaras dengan peruntukan-peruntukan yang terkandung dalam Perlembagaan Persekutuan dan Perjanjian Malaysia 1963.

Tumpuan utama Jawatankuasa Khas Kabinet adalah kepada pelaksanaan perkara-perkara yang terkandung dalam manifesto Pakatan Harapan serta perkara-perkara berbangkit seperti bayaran tunai

atau royalti minyak dan sebagainya yang akan dibincangkan secara berperingkat.

Selain itu juga wakil-wakil daripada Semenanjung, Sabah dan Sarawak, yang mempunyai kepakaran dan pengetahuan dalam hal-hal berkaitan, akan dilantik untuk menganggotai Jawatankuasa Khas Kabinet ini. Senarai keanggotaan tersebut akan dikemukakan kepada YAB Perdana Menteri terlebih dahulu untuk persetujuan supaya tidak terlalu ramai dan mengikut kesesuaian kepakaran dan pengetahuan. Senarai yang telah dimuktamadkan akan diumumkan oleh Menteri di Jabatan Perdana Menteri (Undang-undang).

Untuk makluman Ahli Yang Berhormat, Jawatankuasa Khas Kabinet akan memberikan laporan terperinci kepada Kerajaan dalam tempoh 6 bulan dari tarikh penubuhan untuk pelaksanaan segera. Jabatan Perdana Menteri melalui Bahagian Hal Ehwal Undang-Undang (BHEUU) sebagai urus setia Jawatankuasa Khas Kabinet sedang meneliti perkara di atas, supaya kepentingan semua pihak diambil kira selaras dengan Perjanjian Malaysia 1963.

Sehubungan itu, perkara-perkara yang dibangkitkan Ahli Yang Berhormat mengenai mekanisme pembayaran royalti petroleum, akan turut diambilkira dalam Jawatankuasa Khas Kabinet tersebut sehingga laporan dikeluarkan kepada Kerajaan untuk pelaksanaan oleh pihak-pihak berkaitan.

Sekian, terima kasih.
16 Oktober 2018

Kementerian Hal Ehwal Ekonomi

SOALAN NO : 29

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB TUAN KESAVAN A/L SUBRAMANIAM

KAWASAN : SUNGAI SIPUT

TARIKH : 22 NOVEMBER 2018, KHAMIS

SOALAN :

YB TUAN KESAVAN A/L SUBRAMANIAM minta **MENTERI KERJA RAYA** menyatakan apakah ada perancangan untuk menaik taraf Jalan Persekutuan dari susur keluar Lebuhraya Kuala Kangsar-Ipoh Selatan yang mana Jalan Persekutuan (jalan lama) akan menjadi laluan alternatif oleh pengguna lebuhraya sama ada ke Utara atau Selatan kerana sentiasa berlaku kesesakan apabila tiba musim perayaan atau penutupan jalan akibat penyelenggaraan dan kemalangan di Lebuhraya Kuala Kangsar terutama di Terowong Menora manakala jalan utama Sungai Siput merupakan jalan alternatif yang digunakan sekiranya lencongan dibuat oleh pihak PLUS.

JAWAPAN :

Tuan Yang Di-Pertua,

Pada masa sekarang, Kerajaan tiada perancangan untuk menaiktaraf jalan lama yang menghubungkan Ipoh dan Kuala Kangsar (Jalan Persekutuan FT01). Untuk makluman Yang Berhormat, berdasarkan semakan stesen bancian dan isipadu trafik lalulintas terkini mendapati bahawa Tahap Perkhidmatan Jalan (*Level of Service*, LOS) masih berada pada tahap LOS A iaitu aliran trafik bebas dan lancar. Oleh yang demikian, tiada keperluan untuk menaiktaraf jalan tersebut pada masa kini memandangkan aliran trafik pada jalan sedia ada masih lancar serta masih lagi mampu menampung kapasiti jalan sedia ada.

Walau bagaimanapun, setiap tahun KKR sentiasa menyalurkan peruntukan penyelenggaraan dan program ini dilaksanakan menerusi konsesi Belati Wangsa Sdn. Bhd. Kawalan trafik di jalan utama juga dipertingkatkan semasa musim perayaan dengan diberi keutamaan kepada trafik di jalan tersebut serta di kawasan persimpangan dengan bantuan pihak Polis DiRaja Malaysia (PDRM).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : TUAN WILLIAM LEONG JEE KEEN
[CHERAS]
TARIKH : 22 NOVEMBER 2018 (KHAMIS)

SOALAN NO. 30

Minta **MENTERI KESIHATAN** menyatakan jumlah kes keracunan toksik alkohol selama 5 tahun yang lalu dan cadangan-cadangan yang diambil untuk menangani masalah tersebut.

JAWAPAN

Yang di-Pertua,

Dalam tempoh lima (5) tahun iaitu dari tahun 2013 sehingga 2017 sebanyak 58 kes keracunan metanol telah dilaporkan. Kes keracunan ini menunjukkan penurunan iaitu pada tahun 2013 sebanyak 24 kes, tahun 2014 (11 kes), tahun 2015 (10 kes), tahun 2016 (8 kes) dan pada tahun 2017 (5 kes). Walau bagaimanapun pada tahun 2018, sebanyak 98 kes keracunan kes telah dilaporkan dan melibatkan 48 kematian. Punca keracunan metanol ini adalah disebabkan akibat daripada meminum minuman beralkohol haram atau "*illicit alcohol*".

Kementerian Kesihatan Malaysia (KKM) telah mengambil langkah-langkah proaktif dengan menyebarkan maklumat melalui media sosial, media massa, edaran risalah, poster, nasihat dan ceramah kepada golongan sasaran terutamanya dalam kalangan warga asing yang bekerja di pelbagai sektor di Malaysia. KKM juga telah bekerjasama

dengan pihak Kedutaan untuk menterjemah risalah atau maklumat berkaitan keracunan metanol ke bahasa asing yang berkaitan. Agensi-agensi kerajaan lain yang turut bekerjasama dengan KKM adalah termasuk Polis Diraja Malaysia, Jabatan Kastam Diraja Malaysia, Kementerian Perdagangan Dalam Negeri dan Hal Ehwal Pengguna, Kementerian Luar Negeri serta Kementerian Perumahan dan Kerajaan Tempatan.

Yang di-Pertua,

Untuk memastikan kejadian keracunan metanol ini tidak berulang, KKM menasihatkan pengguna untuk memastikan makanan atau minuman yang dibeli mematuhi syarat-syarat perlabelan seperti maklumat pengeluaran, pengimpot, agen dan juga penyenaraian bahan ramuan. Pengguna juga disarankan untuk tidak membeli minuman yang dijual di premis-premis yang tidak dilesenkan atau dijual dengan harga yang sangat murah dan juga minuman beralkohol yang diproses sendiri (*home-brewed*).

Penguatkuasaan Akta Makanan 1983 di bawah Peraturan-peraturan Makanan 1985 juga perlu dipertingkatkan untuk memastikan pematuhan mengikut standard yang telah ditetapkan bagi minuman-minuman beralkohol yang dijual di pasaran. Aktiviti penguatkuasaan ini penting dalam pencegahan kebolehdapatan minuman beralkohol yang tidak mematuhi Akta Makanan 1983 dan secara tidak langsung boleh mencegah kejadian keracunan metanol.

**PEMBERITAHUAN PERTANYAAN
MESYUARAT KEDUA, PENGGAL PERTAMA
PARLIMEN KEEMPAT BELAS (2018)
DEWAN RAKYAT**

PERTANYAAN : LISAN

**DARIPADA : DATIN MASTURA BINTI MOHD YAZID
[KUALA KANGSAR]**

TARIKH : 22 NOVEMBER 2018 | KHAMIS

SOALAN :

Datin Mastura Binti Mohd Yazid [Kuala Kangsar] minta Perdana Menteri menyatakan kuota haji untuk tahun 2019.

JAWAPAN : (MENTERI DI JABATAN PERDANA MENTERI)

Tuan Yang Di-Pertua, Mesyuarat Pertubuhan Negara-Negara Islam (OIC) pada tahun 1978 di Amman, Jordan, telah memutuskan bahawa Kerajaan Arab Saudi menetapkan kuota haji setiap negara pada **kadar 0.1%** daripada penduduk sesebuah negara berasaskan perangkaan Prospek Populasi Dunia Pertubuhan Bangsa-Bangsa Bersatu (*United Nations World Population Prospect*).

Justeru itu, kuota rasmi jemaah haji Malaysia bagi Musim Haji 1440H/2019M adalah seramai 30,200 orang.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPATBELAS**

PERTANYAAN : JAWAB LISAN

DARIPADA : Datuk Abd Rahim bin Bakri (KUDAT)

TARIKH : 22 NOVEMBER 2018

SOALAN : 32

Datuk Abd Rahim bin Bakri [Kudat] minta MENTERI DALAM NEGERI menyatakan apakah status terkini cadangan pelaksanaan projek bina baru Balai Polis Daerah Pitas. Bilakah projek ini dapat dimulakan memandangkan kemudahan ini amat diperlukan oleh penduduk di Daerah Pitas.

JAWAPAN:

Tuan Yang Di Pertua,

Balai Polis Pitas pada asalnya beroperasi sebagai Pondok Polis dan atas keperluan semasa, perjawatannya dinaiktaraf kepada Balai Polis dan komponen sedia ada yang beroperasi di atas tapak seluas sembilan (9) ekar adalah seperti berikut :

1. Sebuah bangunan Balai Polis jenis batu yang dibina pada tahun 2009 di bawah Pakej Rangsangan Ekonomi (PRE) dengan kos lebih kurang RM200,000.00.
2. Sebuah bangunan papan iaitu bangunan Pondok Polis dengan dua (2) unit rumah (*detached*) telah mula digunakan sejak tahun 2001.

Balai ini beroperasi dengan keanggotaan seramai 23 orang anggota pelbagai pangkat dan diketuai oleh seorang ketua balai berpangkat Inspektor.

Pada masa ini, pihak Kementerian sedang memberi penumpuan dan keutamaan bagi pembinaan projek sedia ada (baharu dan sambungan) serta kerja-kerja menaik taraf premis PDRM yang uzur. Walau bagaimanapun, cadangan projek ini akan dimasukkan dalam *Rolling Plan* (RP) berikutnya sekiranya terdapat keperluan mendesak untuk dilaksanakan.

PEMBERITAHUAN PERTANYAAN DEWAN RAKYAT

PERTANYAAN : LISAN

**DARIPADA : YB DATO' JOHARI BIN ABDUL [SUNGAI
PETANI]**

TARIKH : 22 NOVEMBER 2018

SOALAN : 33

Dato' Johari bin Abdul [Sungai Petani] minta **PERDANA MENTERI** menyatakan apakah perkembangan terkini mengenai siasatan oleh Suruhanjaya Pencegahan Rasuah Malaysia terhadap Laporan oleh Sarawak Report bahawa Mantan Perdana Menteri, YB. Pekan telah menganugerahkan projek tenaga suria bernilai RM1.25 bil untuk 369 buah sekolah di Sarawak kepada Jepak Holdings Sdn. Bhd. pada Januari 2017, sebuah syarikat yang tidak ada kepakaran langsung dalam industri ini.

JAWAPAN: YB Tuan Mohamed Hanipa Maidin,
Timbalan Menteri Di Jabatan Perdana Menteri

Yang Berhormat,

Untuk makluman YB Sungai Petani, siasatan mengenai kes ini telah pun selesai dan mereka yang terlibat telah pun dituduh diMahkamah Sesyen Kuala Lumpur pada 15 November 2018.

Sekian, terima kasih

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : Lisan

**DARIPADA : Tuan Yusuf bin Abd. Wahab
[Tanjong Manis]**

TARIKH : 22 November 2018

SOALAN NO. 34

Tuan Yusuf bin Abd. Wahab minta **MENTERI PERTANIAN DAN INDUSTRI ASAS TANI** menyatakan adakah **pembayaran Elaun Sara Hidup Nelayan** akan diteruskan selepas Bajet 2019 dan **langkah-langkah** Kerajaan untuk **membantu** nelayan-nelayan yang telah dihentikan bantuan elaun sara hidup selepas proses pemutihan yang dijalankan baru-baru ini.

JAWAPAN

Tuan Yang Dipertua,

Untuk makluman Ahli Yang Berhormat, buat masa ini kementerian masih lagi meneruskan bantuan elaun sara hidup kepada nelayan. Walau bagaimanapun, kelangsungan bantuan tersebut tertakluk sepenuhnya kepada kemampuan kewangan semasa kerajaan. Dalam pada itu, kementerian juga sedang mengkaji program-program yang bersasar dan berdasarkan kepada produktiviti bagi memastikan setiap bantuan benar-benar dapat memberi manfaat kepada penerima.

Proses pemutihan yang dijalankan oleh Lembaga Kemajuan Ikan Malaysia adalah bagi memastikan mereka yang benar-benar layak seperti yang disyaratkan sahaja yang menerima bantuan elaun sara hidup.

SOALAN NO : 35

**MESYUARAT KEDUA, PENGGAL PERTAMA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN

DARIPADA : YB TUAN CHOW KON YEOW

KAWASAN : TANJONG

TARIKH : 22 NOVEMBER 2018, KHAMIS

SOALAN :

YB TUAN CHOW KON YEOW minta **MENTERI KERJA RAYA** menyatakan bilakah tol Jambatan Pertama Pulau Pinang dan Tol Sungai Nyior akan dimansuhkan. Selepas dimansuhkan, siapakah yang bakal membiayai atau menanggung kos-kos penyelenggaraan tol-tol berkaitan.

JAWAPAN :

Tuan Yang Di-Pertua,

Untuk makluman Ahli-Ahli Yang Berhormat, Kementerian telah mengadakan perbincangan bersama Unit Kerjasama Awam Swasta (UKAS), Kementerian Kewangan berkenaan hala tuju industri lebuhraya bertol dan hasil perbincangan akan dibentangkan melalui kertas Memorandum Jemaah Menteri dalam masa terdekat. Segala keputusan melibatkan hala tuju industri lebuhraya bertol akan dimuktamadkan setelah mendapat keputusan Jemaah Menteri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT,
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DATO' HJ SALIM SHARIF
[JEMPOL]
TARIKH : 22 NOVEMBER 2018 (KHAMIS)

SOALAN NO. 36

Minta **MENTERI HAL EHWAL EKONOMI** menyatakan bilangan sebenar peneroka FELDA yang terlibat berhubung isu kelewatan bayaran elaun sara hidup dan bayaran hasil peneroka serta tindakan yang diambil untuk mengatasi permasalahan tersebut.

JAWAPAN

Yang di-Pertua,

Untuk makluman Ahli Yang Berhormat, mengikut prosedur FELDA berkaitan bayaran pinjaman Sara Hidup (SH) dan Pendahuluan Hasil (PDH), pembayaran dibuat pada 23 hingga 25 hari bulan pada setiap bulan. Walau bagaimanapun, telah berlaku kelewatan bayaran SH dan PDH pada bulan Jun 2018 dan Julai 2018 seperti berikut :

- i. Bayaran SH dan PDH bulan Jun 2018 telah dibayar pada 6 Julai 2018 iaitu melibatkan pembayaran *paysheet* SH dan *paysheet* PDH berjumlah RM34.6 juta.
- ii. Bayaran SH dan PDH bulan Julai 2018 pula telah dibayar pada 6 Ogos 2018 iaitu melibatkan pembayaran *paysheet* SH dan *paysheet* PDH berjumlah RM31.6 juta.

Dimaklumkan kelewatan bayaran ini tidak lagi berulang dan pembayaran telah kembali dibuat mengikut jadual mulai pembayaran *paysheet* Ogos 2019. Pengurusan FELDA komited untuk memastikan sebarang bayaran kepada peneroka adalah menjadi keutamaan FELDA dan mengikut jadual.

Sekian, terima kasih.
22 November 2018

Kementerian Hal Ehwal Ekonomi

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG KAH WOH
[IPOH TIMUR]**

TARIKH : 22 NOVEMBER 2018 (KHAMIS)

SOALAN NO. 37

Minta **MENTERI PERUMAHAN DAN KERAJAAN TEMPATAN** menyatakan pelan-pelan pembangunan dan **penaiktarafan fasiliti dan infrastruktur untuk Kampung Baru** serta jumlah peruntukkan yang akan disalurkan kepada Kampung Baru pada tahun 2019 berbanding dengan tahun-tahun sebelum ini.

JAWAPAN

Yang di-Pertua,

1. Untuk makluman Yang Berhormat, Kerajaan Baharu di bawah Pakatan Harapan akan menyokong dan meneruskan program-program pembangunan kemudahan infrastruktur dan ameniti sosial di Kampung Baru. Program-program ini bertujuan untuk mempertingkatkan akses penduduk kampung kepada kemudahan infrastruktur yang berkualiti, meningkatkan keselamatan dan keselesaan pengguna serta menggalakkan penduduk kampung menjalankan kegiatan sosial dan aktiviti kemasyarakatan dan seterusnya dapat membantu meningkatkan kualiti hidup penduduk di Kampung Baru.
2. Untuk makluman Yang Berhormat jua, Kerajaan melalui Kementerian Kewangan telah memperuntukkan sejumlah RM85.5 juta bagi pembangunan Kampung Baru Cina pada tahun 2019. Peruntukan pembangunan Kampung Baru ini menunjukkan komitmen Kerajaan di bawah Pakatan Harapan dalam membangunkan dan meneruskan program-program pembangunan kemudahan infrastruktur dan ameniti sosial di Kampung Baru. Antara program yang dilaksanakan adalah:
 - (i) Pembangunan Kampung Baru;
 - (ii) Bantuan baik pulih rumah; dan
 - (iii) Skim pinjaman khas penduduk kampung baru.

Sekian, terima kasih.

PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS
15 OKTOBER HINGGA 11 DISEMBER 2018

PERTANYAAN : LISAN

DARIPADA : TUAN SIVAKUMAR VARATHARAJU NAIDU
[Batu Gajah]

TARIKH : 21 NOVEMBER 2018

SOALAN :

minta **MENTERI INDUSTRI UTAMA** menyatakan prospek industri getah negara kita dalam jangka pendek dan jangka panjang. Nyatakan secara terperinci mengenai produk-produk hasilan getah yang berjaya menembusi pasaran antarabangsa dan sumbangannya kepada ekonomi negara kita.

JAWAPAN:

Tuan Yang Di-Pertua,

Sehingga kini, terdapat kira-kira 300 syarikat pembuat barangan getah di seluruh Malaysia yang menghasilkan lebih 1,000 jenis barangan getah yang dieksport ke 195 negara di seluruh dunia. Barangan getah tersebut terdiri daripada barangan bagi memenuhi permintaan sektor kesihatan, automotif, pembinaan, minyak & gas, pembinaan, pengangkutan, sukan, elektronik dan juga isi rumah.

Pada tahun 2017, industri getah telah menyumbang 4.4% kepada jumlah eksport negara, yang mana 53% adalah dari sektor barangan getah, 22% dari sektor getah asli dan selebihnya dari barangan kayu getah dan lain-lain

jenis getah. Bermula dari tahun 2009 sehingga kini, eksport barangan getah negara telah tumbuh pada kadar yang amat menggalakkan iaitu 9.3% setahun. Destinasi utama pasaran barangan getah adalah Amerika Syarikat iaitu 28% dari keseluruhan jumlah eksport dan negara-negara Kesatuan Eropah sebanyak 24%.

Tuan Yang Di-Pertua,

Barangan getah Malaysia telah mencatatkan pertumbuhan yang memberangsangkan yang mana pihak Kerajaan akan terus berusaha untuk mempromosikan barangan getah ini. Selain dari kilang pengeluar barangan itu sendiri, Lembaga Getah Malaysia (LGM) bersama-sama *Malaysian Rubber Export Promotion Council* (MREPC) dari masa ke semasa menganjurkan misi-misi ekonomi dan perdagangan ke negara luar bagi tujuan promosi. Selain dari itu, MREPC turut menyediakan pelbagai insentif, kajian pasaran serta latihan kepada penggiat industri yang boleh dimanfaatkan dalam usaha mempromosikan barangan keluaran masing-masing.

Antara produk getah utama keluaran Malaysia yang berjaya menembusi pasaran antarabangsa adalah sarung tangan getah yang telah menyumbang RM15.9 bilion atau hampir 50% daripada jumlah eksport getah negara pada tahun 2017. Nilai ini mencakupi 73% daripada pasaran sarung tangan getah dunia. Di samping itu, produk getah eksport lain adalah tayar yang menyumbang sebanyak RM1.5 billion atau 4.5% daripada jumlah eksport getah, bebenang getah sebanyak RM0.7 billion atau 2.2% daripada jumlah eksport getah, kondom sebanyak RM0.4 billion atau 1.4% daripada jumlah eksport getah dan *catheter* sebanyak RM0.2 bilion atau 0.6% daripada jumlah eksport getah.

Sekian terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SRI ABDUL AZEEZ BIN
ABDUL RAHIM
[BALING]**

TARIKH SOALAN : 22 NOVEMBER 2018

SOALAN NO.39

Minta **MENTERI PEMBANGUNAN USAHAWAN** menyatakan apakah langkah Kementerian untuk menangani masalah PKS (Perusahaan Kecil dan Sederhana) untuk mendapatkan pembiayaan daripada institusi kewangan dan apakah pelan tindakan sedia ada untuk membantu komuniti PKS.

JAWAPAN

Tuan Yang Dipertua,

Kementerian amat prihatin ke atas masalah Perusahaan Kecil dan Sederhana (PKS) untuk mendapatkan pembiayaan. Sehubungan itu, Kementerian sedang mengkaji skim-skim pembiayaan yang tersedia di bawah agensinya bagi memastikan kemudahan pembiayaan yang lebih bersepadu.

Untuk makluman Yang Berhormat, beberapa agensi di bawah Kementerian menawarkan pelbagai skim pembiayaan kepada usahawan dan PKS. Ini termasuk:

- (i) **SME Bank**, sehingga kini telah meluluskan pembiayaan sebanyak RM29.4 bilion kepada lebih daripada 16,555 usahawan dengan purata kelulusan (dari tahun 2013 sehingga 2017) sebanyak RM2.6 bilion setahun. Bagi tempoh Januari sehingga September 2018, SME Bank telah meluluskan sekitar RM1.47 bilion bagi membantu lebih 492 usahawan dalam perniagaan mereka (merekodkan kadar kelulusan pinjaman yang tinggi sebanyak 87.5% daripada jumlah permohonan keseluruhan). Di samping itu, SME Bank juga menyediakan:
 - (a) pakej pembiayaan bersama jaminan cagaran yang disediakan oleh pihak *Credit Guarantee Corporation* & Syarikat Jaminan Pembiayaan Perniagaan Berhad (CGC & SJPP) bagi menangani isu kekurangan cagaran yang di hadapi oleh PKS; dan
 - (b) menyediakan bantuan latihan keusahawanan bagi mempertingkatkan kemahiran usahawan dalam menguruskan perniagaan di bawah anak syarikatnya, *Centre for Entrepreneur Development & Research Sdn. Bhd.* (CEDAR).
- (ii) **Bank Rakyat** pula menyediakan pembiayaan berikut:
 - (a) Pembiayaan Mikro-i bagi membantu penaja dan peniaga kecil bagi mengembangkan dan meningkatkan perniagaan di antaranya seperti berikut:

NO. SOALAN : 39

1. *Micro Financing Scheme* (MUkK-i) dimana pembiayaan diberi terus kepada anggota koperasi / Persatuan Penaja & Peniaga Kecil yang menjalankan perniagaan mikro *enterprise*; dan
 2. berkolaborasi dengan agensi lain dalam menyediakan pembiayaan, contohnya dengan pihak SME Corporation melalui *Enrichment & Enhancement Programme* (E²) dan Bank Negara Malaysia melalui *Micro Entrepreneur Fund* (MEF).
- (b) kemudahan pembiayaan serta jaminan bagi menyokong pembangunan peniaga-peniaga PKS untuk:
1. pembelian premis perniagaan;
 2. pembelian tanah dan pembangunan projek;
 3. mengusahakan kontrak yang dianugerahkan oleh kerajaan atau syarikat berkaitan kerajaan; dan
 4. keperluan modal kerja serta aset.
- (c) kolaborasi dengan pihak agensi seperti MARA, SJPP dan CGC dalam bentuk kemudahan memberi jaminan melalui beberapa produk seperti MARA *Entrepreneur Guarantee Scheme* (MEGS).
- (iii) **TEKUN Nasional** ada menyediakan bantuan kepada usahawan kecil Bumiputera dalam mendapatkan pembiayaan dalam perniagaan dengan mudah dan cepat dari RM1,000 sehingga RM100,000 dalam tempoh di antara 6 bulan sehingga 10 tahun dengan caj pengurusan yang paling rendah iaitu 4 % setahun.

TEKUN juga menyediakan pembiayaan kepada kumpulan sasar (*target group*) yang berisiko dan sukar mendapatkan pinjaman daripada institusi kewangan seperti peserta lepasan pusat pemulihan dadah, peserta bekas banduan, peserta dalam kumpulan E- kasih (AZAM TANI), ibu tunggal dan belia yang baru menceburi bidang perniagaan.

Kementerian sentiasa komited dalam membangunkan PKS sebagai penyumbang ekonomi utama negara. Kementerian juga akan memastikan penyampaian perkhidmatan kepada PKS yang lebih jitu bagi memastikan

NO. SOALAN : 39

pembiayaan diberikan kepada mereka yang benar-benar berkeelayakan supaya perniagaan mereka dapat berkembang maju dan kekal kompetitif.

Sekian, terima kasih.

.....

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : Lisan

DARIPADA : Puan Rusnah binti Aluai
[Tangga Batu]

TARIKH : 22 November 2018 (Khamis)

SOALAN NO. 40

PR-1412-L02446

Puan Rusnah binti Aluai [Tangga Batu] minta **MENTERI PERTANIAN DAN INDUSTRI ASAS TANI** menyatakan langkah-langkah untuk menaik taraf sistem pengairan di kawasan jelapang padi di negeri Melaka, khususnya di kawasan Parlimen Tangga Batu.

JAWAPAN

Tuan Yang Dipertua,

Bagi meningkatkan produktiviti pengeluaran padi di Melaka, Kerajaan melalui Kementerian Pertanian dan Industri Asas Tani telah memperuntukkan sejumlah RM35.3 juta di bawah RMKe-11 bagi menaiktaraf sistem pengairan padi Negeri Melaka melibatkan 4 skim pengairan. Daripada jumlah tersebut, RM31.5 juta diperuntukkan khusus untuk membangunkan sistem pengairan di Parlimen Tangga Batu.

Perincian pembangunan sistem pengairan di Melaka di bawah RMKe-11 adalah seperti yang berikut:-

- i. Membina Dan Menaiktaraf Infrastruktur Pengairan & Saliran serta Kerja-kerja Lain Yang Berkaitan di Skim Pengairan Telok Rimba, Daerah Jasin, Melaka dengan peruntukan RM1.65 juta;
- ii. Membina Dan Menaiktaraf Infrastruktur Pengairan & Saliran serta Kerja-Kerja Lain Berkaitan di Skim Pengairan Merlimau, Daerah Jasin, Melaka dengan peruntukan sebanyak RM1.45 juta;
- iii. Membina Dan Menaiktaraf Infrastruktur Pengairan & Saliran serta Kerja-Kerja Lain Berkaitan di Skim Pengairan Solok Duku, Daerah Alor Gajah, Melaka dengan peruntukan sebanyak RM700,000.00; dan
- iv. Membina Infrastruktur Pengairan & Saliran Serta Kerja-kerja Lain Yang Berkaitan di Skim Pengairan Bukit Rambai, Tangga Batu, Daerah Melaka Tengah, Melaka dengan peruntukan sebanyak RM31.5 juta.

Sekian, terima kasih.

PEMBERITAHUAN PERTANYAAN DEWAN RAKYAT

PERTANYAAN : PERTANYAAN-PERTANYAAN JAWAB LISAN

**DARIPADA : TUAN AHMAD BIN HASSAN
[PAPAR]**

TARIKH : 22 NOVEMBER 2018

SOALAN :

minta **MENTERI INDUSTRI UTAMA** menyatakan memandangkan ramai rakyat Sabah terutamanya para penoreh getah yang sangat tidak berpuas hati mengenai harga getah yang tidak seragam antara Semenanjung dan Sabah, sama ada Kementerian akan mewujudkan satu mekanisme bagi menyeragamkan harga getah seperti susu getah, kepingan gred 1 dan 2, kentalan gred 1 dan 2 serta sekerap antara Semenanjung dan Sabah.

JAWAPAN:

Tuan Yang Di-Pertua,

Harga getah sememangnya tidak seragam dan berbeza bukan hanya di antara Semenanjung, Sabah dan Sarawak, malah dalam kalangan pekebun kecil di semua negeri. Harga getah yang berbeza dan tidak seragam ini dipengaruhi oleh pelbagai faktor seperti kandungan getah kering (KGK), kualiti getah, kuantiti getah yang ditawarkan, lokasi kebun dari premis pembelian, bilangan pembeli dan kilang memproses di sesuatu kawasan serta rangkaian pemasaran.

Di samping itu, terdapat beberapa kos lain yang tidak dapat diselaras di Sabah dengan Semenanjung atas beberapa faktor. Pertama, kos tambahan yang perlu ditanggung oleh kilang pemproses untuk bahan pembungkusan, alat-alat ganti jentera kilang, bahan kimia, alat-alat ganti jentera kilang serta harga minyak diesel perindustrian dan gas asli. Kedua, kos-kos tambahan untuk membawa getah keluar dari kawasan pedalaman yang mana infrastruktur seperti jalan raya yang masih mempunyai kekurangan.

Tambahan juga, Sabah mengamalkan dasar satu harga bagi seluruh negeri dan penentuan harga peringkat ladang Sabah adalah di bawah bidang kuasa Lembaga Industri Getah Sabah (LIGS).

Sekian terima kasih.

PEMBERITAHUAN PERTANYAAN DEWAN RAKYAT

PERTANYAAN : JAWAB LISAN

DARIPADA : TUAN CHA KEE CHIN [RASAH]

TARIKH : 22 NOVEMBER 2018 (KHAMIS)

SOALAN : 42

PR-1412-L02344

Tuan Cha Kee Chin [Rasah] minta **MENTERI MENTERI KOMUNIKASI DAN MULTIMEDIA** menyatakan prosedur pemasangan pencawang telekomunikasi di atas bumbung bangunan yang terpakai di seluruh negara, termasuk jarak terdekat dari unit kediaman terdekat dan syarat-syarat lain yang perlu dipatuhi.

JAWAPAN:

Tuan Yang di-Pertua,

1. Untuk makluman Ahli Yang Berhormat, bagi pembinaan menara komunikasi sama ada di kawasan bandar atau luar bandar, pembinaan tersebut hendaklah berpandukan kepada “Garis Panduan Pembinaan Menara dan Struktur Pemancar Komunikasi” yang telah ditetapkan oleh Kementerian Perumahan dan Kerajaan Tempatan (KPKT) dan terletak di bawah bidang kuasa Pihak Berkuasa Tempatan (PBT).
2. Struktur komunikasi yang dibina di kawasan bandaraya di Malaysia kebanyakannya berbentuk struktur atas bumbung (*rooftop*) yang dipasang di atas bangunan tinggi, dan juga diintergrasikan dengan struktur lain seperti tiang lampu, papan iklan besar (*billboard*) dan menara Muazzin. Walaubagaimanapun, sekiranya terdapat sebarang keperluan bagi pembinaan menara di kawasan bandar, permohonan tersebut hendaklah dipertimbangkan oleh Pihak Berkuasa Tempatan (PBT) namum jumlahnya hanya sedikit. Perkara yang sama turut digunakan sebagai negara-negara luar mahupun di bandaraya-bandaraya besar seperti Tokyo, Seoul dan Singapura. Manakala struktur menara komunikasi adalah lebih bersesuaian dilaksanakan di kawasan pinggir bandar, luar bandar dan sekitar kawasan yang luas di seluruh negara.

SOALAN NO: 42

3. Di Malaysia, pembinaan menara komunikasi dibina mengikut garis panduan yang telah diselaraskan dengan mematuhi piawaian keselamatan antarabangsa dan amalan keselamatan yang ditetapkan.
4. Pemasangan kesemua struktur komunikasi adalah bagi menambahbaik kualiti perkhidmatan komunikasi secara menyeluruh di rantau negara termasuk di kawasan bandaraya-bandaraya.
5. Daripada sudut keselamatan dan persekitaran, jarak menara di lokasi tersebut adalah mematuhi jarak minimum menara yang ditetapkan dalam “Garis Panduan Pembinaan Menara dan Struktur Sistem Pemancar Telekomunikasi dalam Kawasan Pihak Berkuasa Tempatan 2002” yang dikeluarkan oleh Kementerian Kesejahteraan Bandar, Perumahan dan Kerajaan Tempatan – sekarang dikenali sebagai Kementerian Perumahan dan Kerajaan Tempatan di mana pembinaan semua jenis menara telekomunikasi hendaklah berpandukan jadual berikut:

	Jarak minimum menara dari bangunan terdekat (meter) – <i>nearest existing building</i>	
Jenis Bangunan	Ketinggian Menara Bawah daripada 45 meter	Ketinggian Menara 45 meter dan lebih
Kediaman	20 meter	30 meter
Komersial	10 meter	15 meter
Industri	5 meter	10 meter

6. Bagi pembinaan menara komunikasi sama ada di kawasan bandar, luar bandar atau taman perumahan, pembinaan hendaklah berpandukan kepada “Garis Panduan Pembinaan Menara dan Struktur Pemancar Komunikasi” yang telah ditetapkan oleh Kementerian Kesejahteraan Bandar, Perumahan dan Kerajaan Tempatan (KPKT). Garis panduan tersebut menyatakan keperluan jarak anjakan dengan had ketinggian tertentu, keperluan keselamatan seperti pagar dan langkah penstabilan cerun serta aspek-aspek lain yang perlu dipatuhi oleh syarikat penyedia perkhidmatan.

7. Maklumat daripada penduduk atau orang awam berhubung tahap liputan perkhidmatan amat berguna dalam membantu pihak syarikat penyedia perkhidmatan membuat perancangan bagi menambahbaik liputan dan kualiti perkhidmatan yang ditawarkan. Manakala peranan Pihak Berkuasa tempatan (PBT) pula amat diperlukan dalam menerima permohonan baru sesuatu pembangunan infrastruktur komunikasi dalam kawasan pentadbiran mereka. Jawatankuasa Setempat (OSC) di peringkat PBT turut diwakili oleh agensi-agensi teknikal yang berkepakaran dalam bidang tugas masing-masing seperti SKMM, TNB, DCA dan BOMBA bagi menilai dan mengulas sesuatu permohonan tersebut. Peranan persatuan penduduk dan Pihak Berkuasa Tempatan (PBT) adalah penting di mana maklumat-maklumat berkenaan kawasan yang belum mendapat liputan ataupun yang mempunyai isu kualiti perkhidmatan boleh disalurkan kepada SKMM bagi perancangan peluasan dan penambahbaikkan liputan komunikasi.

8. Walaubagaimanapun, lokasi sebenar menara yang akan dibina adalah bergantung kepada faktor teknikal seperti ketersediaan *line of sight*, rangkaian sedia ada dan bekalan elektrik, dan kelulusan muktamad bagi pembinaan sesuatu menara akan ditentukan oleh pihak PBT yang berkaitan.

**PEMBERITAHUAN PERTANYAAN LISAN DEWAN RAKYAT,
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : DR. HASAN BIN BAHAROM
[TAMPIN]
TARIKH : 22 NOVEMBER 2018 (KHAMIS)

SOALAN NO. 43

Minta **MENTERI HAL EHWAL EKONOMI** menyatakan berhubung kait dengan rumah Generasi Kedua FELDA:-

- a) apakah Kementerian telah berusaha menggunakan pelbagai pendekatan dalam membina rumah generasi kedua FELDA yang sehingga kini masih belum dapat diselesaikan; dan
- b) apakah Kementerian bersedia untuk membuat kajian dan melakukan pindaan kepada Akta GSA 1967 di mana satu tapak rumah hanya dibenarkan membina satu rumah sahaja dan ia akan membebaskan generasi kedua.

JAWAPAN

Yang di-Pertua,

Untuk makluman Ahli Yang Berhormat, projek Perumahan Generasi Baharu FELDA (PGBF) sekarang ini telah masuk ke fasa serahan kunci rumah di enam (6) tapak projek dengan bilangan sebanyak 1,234 unit siap sepenuhnya dengan Sijil Perakuan Siap dan Pematuhan (CCC).

FELDA juga telah membuat penilaian keseluruhan dengan menyusun semula tapak-tapak projek yang hampir siap dengan nilai baki kerja yang kecil untuk disiapkan seterusnya diserahkan kepada peserta. Perbincangan diadakan bersama Pentadbir Tanah Negeri untuk membantu mempercepatkan proses kelulusan permohonan hak milik rumah PGBF bagi membolehkan penjualan rumah dilaksanakan. Penyusunan semula kerja penyiapan dan penjualan rumah ini dilakukan bagi membolehkan hasil jualan digunakan untuk menampung perbelanjaan pembinaan di tapak yang masih berjalan. Ia akan dapat membantu dalam perbelanjaan pembangunan FELDA yang kini menghadapi masalah kedudukan kewangan semasa yang amat kritikal.

Selain itu, dasar pemilikan rumah PGBF ini juga akan dipinda iaitu sebahagian bilangan rumah digazetkan kepada generasi baharu FELDA yang kurang mampu dan sebahagian lagi akan dijual kepada generasi baharu FELDA yang boleh membeli.

Berkaitan cadangan Ahli Yang Berhormat bagi pindaan kepada Akta Tanah (Kawasan Penempatan Berkelompok) 1960 (GSA 1960), merujuk kepada akta berkenaan, tidak dinyatakan sekatan atau halangan untuk membina dua rumah di atas satu tapak. Walau bagaimanapun,

halangan membina lebih satu rumah di dalam satu tapak rumah peneroka ada dinyatakan dalam Perjanjian Peneroka bersama FELDA semasa kemasukan sebagai Peneroka FELDA (tanaman kelapa sawit dan getah).

Di samping itu, Syarat Nyata dan Sekatan Kepentingan yang dinyatakan dalam setiap hak milik Daftaran dan Keluaran oleh setiap Negeri hanya menetapkan untuk sebuah rumah sahaja dan tidak boleh dibina untuk dua unit rumah. Namun, Seksyen 37 Akta GSA 1960 memberikan kuasa kepada Pengerusi Pihak Berkuasa Pembangunan iaitu Pengerusi FELDA, selepas berunding dengan Pihak Berkuasa Negeri yang berkaitan dan dengan kelulusan Menteri boleh membuat apa-apa undang-undang kecil bagi melaksanakan apa-apa peruntukan Akta ini sepertimana yang terpakai bagi Kawasan Pembangunan Persekutuan [(Seksyen 34(2) dan Seksyen 38(1)).

Dengan mengguna pakai peruntukan tersebut, FELDA membuat satu dasar yang membenarkan pembinaan lebih satu rumah di dalam satu tapak rumah milik peneroka yang telah diluluskan oleh Mesyuarat Lembaga FELDA Bil. 366 bertarikh 24 Ogos 2017. Kelulusan dasar ini membolehkan FELDA mengeluarkan Pekeliling Bil. 1/ 2017 Jabatan Pengurusan Tanah iaitu "Tatacara Permohonan Membina Lebih Satu Rumah Di Dalam Satu Tapak Rumah Milik Peneroka" yang berkuat kuasa pada 1 Oktober 2017 (Pindaan 1 Julai 2018). Pekeliling ini telah diedarkan kepada semua Rancangan FELDA dalam 10 Wilayah FELDA bagi tujuan pelaksanaan dasar tersebut tanpa memerlukan pindaan kepada Akta GSA 1960. Peruntukan Seksyen 37 Akta GSA 1960 berkenaan memerlukan perundingan dengan Pihak Berkuasa Negeri. FELDA telah mendapatkan pandangan dari Jabatan Ketua Pengarah

Tanah dan Galian Persekutuan supaya penambahbaikan dasar dengan melibatkan semua negeri agar suatu undang-undang kecil bagi maksud perlaksanaan dasar ini dapat dilaksanakan.

Sekian, terima kasih.

22 November 2018

Kementerian Hal Ehwal Ekonomi

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : YB DATUK HALIMAH BINTI MOHAMED
SADIQUE
[KOTA TINGGI]**

TARIKH : 22 NOVEMBER 2018 (KHAMIS)

SOALAN NO. 44

Minta **MENTERI HAL EHWAL EKONOMI** menyatakan adakah Kementerian akan memperhalusi semula paras garis kemiskinan di Semenanjung, Sabah dan Sarawak dengan menetapkan PGK di kawasan luar bandar dan bandar.

JAWAPAN

Yang di-Pertua,

Untuk makluman Ahli Yang Berhormat, Pendapatan Garis Kemiskinan (PGK) dikemas kini setiap kali Kerajaan menerbitkan laporan Penyiasatan Pendapatan Isi Rumah dan Kemudahan Asas (PPIR & KA). Penyiasatan ini dilaksanakan dua kali dalam tempoh lima tahun. Laporan yang terkini diterbitkan pada tahun 2016 manakala laporan seterusnya akan diterbitkan pada tahun 2020.

PGK Mengikut Wilayah Dan Strata tersebut adalah seperti jadual dibawah:

PGK Mengikut Wilayah & Strata, Malaysia (RM)

	2014	2016
Malaysia	950	980
Bandar	960	990
Luar bandar	910	930
Semenanjung	930	960
Bandar	940	970
Luar bandar	870	880
Sabah	1,170	1,180
Bandar	1,160	1,170
Luar bandar	1,180	1,220
Sarawak	990	1,020
Bandar	1,040	1,070
Luar bandar	920	9,40

Sumber: Penyiasatan Pendapatan Isi Rumah dan Kemudahan Asas, 2014 & 2016

Kerajaan akan mengkaji semula model PGK yang digunakan supaya lebih mencerminkan corak penggunaan dan kos sara hidup semasa. Ini termasuk mempertimbang sekiranya terdapat keperluan bagi menetapkan PGK mengikut bandar dan luar bandar di Semenanjung serta di Sabah dan Sarawak. Dengan kajian semula ini, semua isi rumah yang dikategorikan sebagai miskin, termasuk miskin bandar, akan layak mendapat bantuan yang diperlukan.

Dalam kajian ini, faktor-faktor selain daripada pendapatan seperti pendidikan, kesihatan dan taraf hidup akan diteliti dalam menghasilkan indeks kemiskinan yang baharu. Indeks ini dinamakan MPI akan memberikan tafsiran yang lebih baik bagi isi rumah miskin dan miskin tegar serta lebih bersasar.

Sekian, terima kasih.
22 November 2018

Kementerian Hal Ehwal Ekonomi

**PEMBERITAHUAN PERTANYAAN
DEWAN RAKYAT, MALAYSIA**

PERTANYAAN : LISAN

**DARIPADA : DATO' DR. MOHD KHAIRUDDIN BIN AMAN
RAZALI [KUALA NERUS]**

TARIKH : KHAMIS, 22 NOVEMBER 2018

RUJUKAN : L5 [PR-1412-L01785]

SOALAN :

Dato' Dr. Mohd Khairuddin bin Aman Razali [Kuala Nerus] minta **MENTERI WILAYAH** menyatakan statistik pusat hiburan berdaftar dan tidak berdaftar di Kuala Lumpur serta menjelaskan usaha bagi menangani kesan negatif daripada kewujudan pusat-pusat hiburan ini.

Tuan Yang Di-Pertua,

Untuk makluman Yang Berhormat, terdapat 672 buah pusat hiburan berlesen di Wilayah Persekutuan Kuala Lumpur pada masa ini. Aktiviti pusat hiburan ini adalah tertakluk kepada syarat-syarat dan peraturan yang telah ditetapkan oleh Dewan Bandaraya Kuala Lumpur (DBKL) untuk beroperasi di bawah Akta Hiburan (Wilayah Persekutuan Kuala Lumpur) 1992 dan Kaedah-Kaedah Hiburan (Wilayah Persekutuan Kuala Lumpur) 1993.

Bagi pusat hiburan tanpa lesen, sepanjang tahun 2018 DBKL telah melaksanakan tindakan penguatkuasaan dengan membuat tindakan penutupan ke atas 7 buah premis hiburan dan juga telah membuka sebanyak 19 Kertas Siasatan (I.P) untuk tujuan kompaun atau pendakwaan di Mahkamah.

Tindakan Penguatkuasaan ke atas pusat hiburan di Kuala Lumpur sentiasa dilaksanakan bagi mengambil tindakan ke atas premis hiburan yang tidak berlesen serta bertujuan untuk mengekang aktiviti-aktiviti tidak bermoral seperti penyalahgunaan dadah dan pelacuran. Tindakan ke atas pusat hiburan dilaksanakan di bawah Akta Hiburan (Wilayah Persekutuan Kuala Lumpur) 1992. Perincian seperti berikut :

Operasi Khas Premis Hiburan (2018) :

BIL.	PERKARA	JUMLAH
1.	Operasi	12 Kali
2.	Premis Diperiksa	43 Premis
3.	Kompaun	31notis
4.	Notis IP	19 Notis
5.	Sita Peralatan Hiburan	11 Kes
6.	Penutupan Premis	7 Premis

Tindakan ke atas pusat hiburan juga diambil berdasarkan aduan awam yang diterima oleh pihak DBKL terutamanya berkaitan aduan premis hiburan tanpa lesen dan kacau ganggu bunyi bising. Perincian seperti berikut :

Aduan Berkaitan Pusat Hiburan (2018) :

BIL.	JENIS ADUAN	JUMLAH
1.	Pusat Hiburan	3 Aduan
2.	Kacau Ganggu Bunyi Bising	72 Aduan

Kementerian Wilayah juga melaksanakan tindakan ke atas pusat hiburan melalui beberapa siri **Operasi Banteras Aktiviti Haram (Ops BAH)** yang juga melibatkan pelbagai agensi kerajaan dan juga NGO seperti perincian berikut :

Operasi BAH (2018) :

BIL.	PERKARA	JUMLAH
1.	Pusat Hiburan / Karaoke	18 Premis
2.	Arak (Kastam)	603 Karton
3.	Notis Kompaun (Kastam)	13 Notis
4.	Pati (Imigresen)	60 Orang
5.	Dadah (AADK)	419 Orang
6.	Notis (JAWI)	430 Notis
7.	Minum Arak / Gro / Pondan (JAWI)	150 Orang
8.	Pembatalan Lesen (DBKL)	2 Kes
9.	Notis Kompaun (DBKL)	18 Notis
10.	Penutupan Premis	2 Premis

SOALAN NO : 45

Oleh itu, bagi memastikan kewujudan pusat-pusat hiburan ini tidak menimbulkan kesan negatif yang serius kepada masyarakat, beberapa usaha telah dijalankan oleh pihak DBKL khususnya bersama agensi berkaitan seperti Polis DiRaja Malaysia (PDRM), Kastam DiRaja Malaysia (KDRM), Jabatan Imigresen Malaysia (JIM), Jabatan Agama Islam Wilayah Persekutuan (JAWI) dan Agensi Anti Dadah Kebangsaan (AADK). Di antara usaha yang telah dan sedang dijalankan termasuklah:

- i. Mengadakan peraturan dan syarat yang ketat ke atas operasi pusat hiburan;
- ii. Mengadakan pemeriksaan dan pemantauan secara berterusan ke atas pusat hiburan bagi memastikan mereka beroperasi mengikut syarat dan peraturan yang ditetapkan;
- iii. Mengadakan operasi penguatkuasaan secara mengejut ke atas pusat hiburan yang disyaki melanggar syarat dan peraturan. Membatalkan lesen dan/atau merampas wang cagaran ke atas pusat hiburan yang melanggar syarat dan peraturan; dan
- iv. Menyita dan menutup pusat hiburan yang beroperasi tanpa lesen.

Pemilik pusat hiburan yang terbabit atau didapati melakukan kesalahan akan dikenakan Notis Kompaun Dan Pendakwaan ke Mahkamah akan diteruskan sekiranya kompaun yang dikeluarkan tidak dijelaskan. Kompaun maksima bagi kesalahan di bawah Akta Hiburan (Wilayah Persekutuan Kuala Lumpur) 1992 adalah berjumlah RM 50,000.00.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN WAN HASSAN BIN MOHD RAMLI
[DUNGUN]
TARIKH : 22 NOVEMBER 2018 (KHAMIS)

SOALAN NO. 46

Y.B. TUAN WAN HASSAN BIN MOHD RAMLI [DUNGUN] minta **MENTERI KEWANGAN** menyatakan jumlah wang royalti minyak yang telah diserahkan kepada negeri pengeluar minyak seperti Kelantan, Terengganu, Sabah dan Sarawak pada tahun ini.

JAWAPAN

Tuan Yang di-Pertua,

1. Untuk makluman **Y.B. Dungun** dan Dewan Yang Mulia ini, bayaran tunai 5% daripada pengeluaran petroleum dibayar oleh PETRONAS kepada negeri Sabah dan Sarawak pada tahun 2018 (setakat 16 Oktober) masing-masing berjumlah RM1,606.63 juta dan RM1,753.06 juta.
2. Bagi pengeluaran petroleum di Semenanjung Malaysia, tiada bayaran tunai dibuat oleh PETRONAS kepada negeri-negeri kerana kedudukan medan pengeluaran yang beroperasi adalah di luar wilayah negeri-negeri. Kerajaan Persekutuan menyediakan bayaran dalam bentuk wang ehsan kepada negeri-negeri terdekat dengan kawasan pengeluaran iaitu Kelantan dan Terengganu yang mana dana wang ehsan tersebut digunakan bagi melaksanakan projek dan program untuk manfaat rakyat di negeri berkenaan. Kementerian kini menunggu arahan untuk tindakan seterusnya sekiranya perlu sebarang perubahan.

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL PERTAMA
PARLIMEN KEEMPAT BELAS**

PERTANYAAN : LISAN

**DARIPADA : USTAZ HAJI HASANUDDIN BIN MOHD
YUNUS [HULU LANGAT]**

TARIKH : 22 NOVEMBER 2018 (KHAMIS)

SOALAN NO. 47

Ustaz Haji Hasanuddin Bin Mohd Yunus [Hulu Langat] minta **MENTERI PERTANIAN DAN INDUSTRI ASAS TANI** menyatakan adakah kerajaan akan mewujudkan polisi dan akta baru bagi menyahut seruan dunia bagi pemuliharaan sumber lautan.

JAWAPAN

Tuan Yang Dipertua,

Kementerian Pertanian Malaysia dan Industri Asas Tani melalui Jabatan Perikanan Malaysia telah dipertanggungjawab bagi mengurus sumber perikanan agar bekalan ikan makan dalam negara adalah terus mapan. Dalam hal ini, **Kerajaan telah menggubal Akta Perikanan 1985** yang telah menggariskan pengurusan dan pemuliharaan perikanan di kelautan serta muara perairan perikanan Malaysia.

Antara usaha bagi memastikan pemuliharaan sumber perikanan adalah sebagaimana termaktub di dalam Seksyen 26 Akta Perikanan 1985 yang menjelaskan mengenai larangan penangkapan ikan dengan menggunakan alatan tangkapan terlarang seperti bahan letupan racun, dan sebagainya.

Sebagai tambahan, Seksyen 26 ini juga diperkukuh dengan Peraturan-Peraturan Perikanan (Larangan Cara Menangkap Ikan) 1980. Dalam hal ini, Kementerian Pertanian dan Industri Asas Tani melalui Jabatan Perikanan Malaysia membatalkan dengan serta-merta lesen vesel yang telah dilesenkan di bawah Akta Perikanan 1985 sekiranya disabit menjalankan aktiviti penangkapan ikan secara haram. Pemantauan juga dibuat secara berkala dan *ad-hoc* berdasarkan kepada aduan yang diterima di peringkat daerah dan negeri.

Selain itu, bagi memastikan kelestarian sumber bekalan makanan disamping meneruskan pembangunan industri perikanan, Jabatan

Perikanan Malaysia memberi lebih tumpuan dan fokus kepada pembangunan perikanan laut dalam. Ia adalah sebagai alternatif kepada sumber bekalan ikan negara yang kini terdedah kepada pengeksploitasian sumber terutamanya di kawasan perairan pantai yang telah mencapai tahap optima.

**PEMBERITAHUAN PERTANYAAN LISAN DEWAN RAKYAT,
MESYUARAT KEDUA, PENGGAL PERTAMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN JUGAH ANAK MUYANG @ TAMBAT
[LUBOK ANTU]**

TARIKH : 22 NOVEMBER 2018 (KHAMIS)

SOALAN NO. 48

Minta **MENTERI PENDIDIKAN** menyatakan untuk mengkaji semula pengambilan pelajar graduan yang menganggur dan tidak diterima bekerja memandangkan pinjaman PTPTN belum diselesaikan.

[Pertanyaan di bawah PM.22 (5)]

JAWAPAN

Yang di-Pertua,

Untuk makluman Ahli Yang Berhormat, berdasarkan Sistem Kajian Pengesanan Graduan yang dijalankan oleh Kementerian Pendidikan Malaysia (KPM) pada tahun 2017, kadar kebolehpasaran graduan dalam tempoh 6 bulan selepas bergraduan adalah sebanyak 79.1 peratus.

KPM telah memperkenalkan pelbagai inisiatif dalam usaha memastikan graduan kompeten berdaya saing dalam alam pekerjaan masa hadapan. Antara inisiatif Kementerian adalah:

- i. Program akademik dimantapkan melalui penawaran kurikulum baharu dan bersifat *Nation Building* serta penjumudan kurikulum dan program akademik yang tidak relevan melalui penubuhan Jawatankuasa Transformasi Program Akademik Universiti Awam;

- ii. Pelan Strategik Kebolehpasaran Graduan 2019-2023 (PSGE) telah merancang beberapa program dan inisiatif untuk meningkatkan kebolehpasaran graduan melibatkan program-program intervensi serta kerjasama erat dengan industri bagi membuka peluang pekerjaan yang lebih meluas. *Integrated Graduate Employability Structured Program (i-GESP)*, *Graduate Employability Intervention Program* dan Program IR 4.0 dirancang secara berstruktur bersama industri.
- iii. Pelaksanaan *Job Creator Framework* di bawah lonjakan 1 Pelan Pembangunan Pendidikan Malaysia 2015-2025 (Pendidikan Tinggi) atau PPPM(PT) yang menerapkan nilai dan atribut keusahawanan dalam kalangan pelajar melalui pendidikan untuk menganjakkan minda mereka daripada pencari kerja (*job seeker*) kepada pencipta kerja (*job creator*);
- iv. Program keusahawanan digital bercirikan IR4.0 dengan kerjasama industri seperti *Global E-Commerce Talent (GET)* bersama Alibaba Business School, *Youth E-Commerce Program* bersama *Alibaba Business School*, *SiswaMall@11th Street*, *Symbiosis TVET Program* bersama *Malaysian Technology Development Corporation* dan lain-lain.

Di samping itu, beberapa program kolaborasi antara industri dan universiti awam turut dilaksanakan antaranya seperti berikut:

- v. Penekanan "*industry and academia are one*" melalui pelaksanaan program intervensi kebolehpasaran graduan di peringkat nasional dan institusi. Antara program yang akan dilaksanakan ialah program pentauliahan profesional industri dan *Industry-Graduate Employability Structured Program*. Kerjasama industri turut ditekankan melalui program *Academia Industry Talent Exchange Programme (AI-xChange): CEO@Faculty Programme*.
- vi. *Engineering@UM-Industrial Innovation Centre* di kampus UM menempatkan fasiliti *research and development* bagi kegunaan bersama para jurutera syarikat seperti Motorola, Daikin, Ossur,

Rohde&Schwarz dan Proton bersama penyelidik, staf dan pelajar university.

- vii. *CIMB Trading Room dengan kerjasama CIMB Investment Bank-UiTM Segamat, Johor* membolehkan pelajar mempraktikkan segala teori pembelajaran yang ditimba secara terus dengan menggunakan platform *itrade@CIMB* sebagai platform pelaburan sebenar.
- viii. *'Internet of Things' (IoT) Academy* oleh Samsung Malaysia - Universiti Teknikal Melaka memberi inspirasi dan membuka ruang yang luas kepada generasi muda untuk mendapat pendedahan dan dilatih menjadi usahawan teknologi.
- ix. Pusat UTM - ERICSSON IC5G iaitu pusat kerjasama Ericsson dan Universiti Teknologi Malaysia untuk melaksanakan penyelidikan dan pembangunan, latihan berorientasikan keperluan industri dan pameran teknologi 5G di rantau ini.
- x. Firma perakaunan Salihin Associates dengan kerjasama Universiti Malaysia Terengganu dan Universti Teknologi MARA mewujudkan Teaching Accounting Firm (TAF) di dalam universiti.

KPM turut melaksanakan pelbagai program yang berimpak tinggi lain antaranya Pidato Antarabangsa Bahasa Melayu, Debat Diraja, Konvensyen Pemimpin Mahasiswa Islam IPT dan Anugerah Tokoh Siswa, *Gap Year*, *International Student Sports Carnival* dan penglibatan pelajar melalui badan-badan beruniform seperti Pasukan Latihan Pegawai Simpanan, Kor Sukarelawan Polis Siswa/Siswi, Kor Siswa/Siswi Pertahanan Awam dan Kumpulan Latihan Kelanasiswa Malaysia dilihat mampu memperkukuhkan lagi nilai-nilai jati diri pelajar seterusnya meningkatkan nilai kebolehpasaran graduan.